

人未有不願自己及與子孫悉皆長壽安樂者。若於色欲不知戒慎。則適得其反。誠可痛傷。故孔子曰。少之時。血氣未定。戒之在色。孟子曰。養心者。莫善於寡欲。其爲人也。寡欲。雖有不存焉者。寡矣。其爲人也。多欲。雖有存焉者。寡矣。由是言之。人之死生存亡。係於色欲之能寡與否者。居其多半。不慧絕無救世之力。頗存壽世之心。爰增輯刊布此書。以期自愛而并愛其子。若孫者。得是編而詳閱之。則利害之關。明若觀火。內而戒勸子孫。外而戒勸同倫。又祈展轉流通。俾徧寰宇。庶一切同人。咸獲壽康。是所馨香而禱祝者。

壽康寶鑑

人從色欲而生。故其習偏濃。一不戒慎。多致由色欲而死。古聖王以愛民之故。卽夫婦房事。不惜令適人以木鐸巡于道路。冀免悞送性命之虞。其慈愛爲何如也。及至後世。不但國家政令不復提及。卽父母與兒女。亦不提及。以致大多數少年。悞送性命。可哀孰甚。不慧閱世數旬。見聞頗多。不禁悲傷。因募印此書。冀諸同倫。咸獲壽康。所願得此書者。各各詳閱。展轉流通。勿令徒費心思錢財。而毫無實益。則幸甚幸甚。

流通有益於世道人心之經書十六法

一 全施流通

慨捐巨款，刷印多部施送，不取分文。此種功德甚溥，無力者或附印少分，或代爲校字，或代爲募勸，亦有莫大之功德在。

二 半施流通

或助紙價，或助印資，裝釘之費，隨便發心，以己微願，助成勝舉，皆名爲施，亦名半施。能出至誠，歡欣爲之，不矜不怯，功德殊勝。

三 祈福流通

求名，求利，求子，求壽，苟能隨力印施，所願必遂，或因親病而求速愈，許願印施，惟至誠可以動天地，此願甫發，靈應立見。

四 懺罪流通

人非聖賢，誰能無過，但天道禍淫，不罪悔過之人，人須知過，及早悔罪，卽以流通經典爲贖罪之方，毅然立行，夙障自消。

五 報恩流通

子女受父母之深恩，劬勞未報，一旦親歿，悲痛何如，但印送經書，可資冥福，可盡孝思，望舉世子女之抱恨終天者，力以圖之。

六 憫殤流通

無緣無怨，不成父子，緣盡便離，怨消卽去，早歲夭殤，所在都有，與其擲金錢於無謂之舉，不如印送經典，以助超拔，祈賢父母爲結法緣。

七 吉慶流通

遇成名獲利，開業建造，就職升遷，婚嫁育子，壽誕等事，當戒殺生，以免造孽，刊經典以綿福澤，既能自他俱利，將見吉慶益臻。

八 饋送流通

賀禮贖禮，贊禮等，往來表情，須用敬物，可竟以經書代之，普願海內賢達，示範當來，收移風易俗之效，於不動聲色之間。

九宣講流通

逢朔望星期休息日在家則集家人在鄉則集里人方便宣說使失學之人同沾法益使先聖大化普及齊民此先覺者應盡之天職也

十函牘流通

朋輩尺素往還滅除無益虛文時引先哲立身處世金言互相勉助盡他山攻錯之誠就各人程度各人弱點規勸而裨益之

十一繕寫流通

善寫之士凡遇求書法者必選經書中至言法言寫之藉以正人心維世道厥功甚巨能寫全全部付梓行世其功德更無量

十二翻印流通

裨益人心世道之經典例無版權大宜集資翻印以廣流布使舉世漸仁摩義免至蕩檢踰閑空天下之牢弭百世之劫胥基於此

十三貿易流通

書坊刷印善書取流動消行法推廣貿易或發兌於舉行勝會之場或負販至各大都會之中方便讀者不惟造福兼可益資

十四旅行流通

年來交通日便千里之遠日暮可達旅行既便旅客日多抱道之士若一路開發或攜經典善書於沿途散布爲羣爲法兩多裨益

十五廣告流通

賣買商人利用廣告則貿易日昌宏法之士大宜用此新式宣傳法爲流通之助隨時以研究所得登佛學報及各報以期普利

十六公閱流通

得經典而束之高閣者有罪過閒置案頭不能公之大衆者有罪過樂爲多衆宣說廣行化導莫善於各地方設立公閱經書處

以上十六種流通法依據先賢定則參酌時代情勢擬之

壽康寶鑑序

人未有不欲長壽康寧。子孫蕃衍。功業卓著。吉曜照臨者。亦未有不欲短折疾病。後嗣滅絕。家
破人亡。凶神莅止者。此舉世人之常情。雖三尺孺子。莫不皆然。縱至愚之人。斷無幸災樂禍。
禍福無門。惟人所召。而好色貪淫之人。心之所期。與身之所行。適得其反。卒至所不欲者。悉得。而所
欲者。悉莫由而得。可不哀哉。彼縱情花柳。唯此是圖者。姑勿論。卽夫婦之倫。若一貪酒。必致
身殞命。亦有并不過貪。但由不知忌諱。忌諱種種詳示書後此不備書冒昧從事。以致死亡者。殊堪憐愍。
故前賢輯不可錄。備明色欲之害。其戒淫窒欲之格言。福善禍淫之證案。持戒之方法。日
久益諱之時。處人事。不憚繁瑣。縷析條陳。俾閱者知所警戒。其覺世救民之心。可謂懇切周
至矣。而印光復爲增訂。以名壽康寶鑑。復爲募印廣布者。蓋以有痛于心。而不容已也。一弟
子羅濟同。四川人。年四十六歲。業船商于上海。其性情頗忠厚。深信佛法。與關綱之等合辦
業社。民國十二年。常欲來山歸依。以事羈。未果。十四年。病膨脹數月。勢極危險。中西醫
治無效。至八月十四。清理藥帳。爲數甚鉅。遂生氣曰。我從此縱死。亦不再吃藥矣。其妾乃于
佛前懇禱。願終身吃素念佛。以祈夫愈。卽日下午。病轉機。大瀉淤水。不藥而愈。光于八月底

事申。寓太平寺。九月初二。往淨業社。會關綱之。濟同在焉。雖身體尚未大健。而氣色淳淨。光華無與等者。見光喜曰。師父來矣。當在申歸依。不須上山也。擇于初八。與其妾至太平寺。同受三歸五戒。又請程雪樓。關綱之。丁桂樵。歐陽石芝。余峙蓮。任心白等諸居士。陪光吃飯。初九。又請光至其家吃飯。且曰。師父卽弟子等之父母。弟子等卽師父之兒女也。光曰。父母唯疾之憂。汝病雖好。尙未復原。當慎重。惜未明言所慎重者。謂房事也。至月盡日。于功德林。與監獄感化會。彼亦在會。衆已散。有十餘人。留以吃飯。彼始來。與司帳者交代數語而去。其病貌直同死人。光知其犯房事所致。切悔當時只說父母唯其疾之憂。未曾說其所以然。以復孺于危也。欲修書切戒。以宥繁。未果。九月初六。至山。卽寄一信。極陳利害。然已無可救。不數日卽死。死時。關綱之。邀諸居士。皆來念佛。其得往生西方與否。未可知。當不至墮落。夫以數月大病。由三寶加被。不藥而愈。十餘日閒。氣色光華。遠勝常人。由不知慎重。悞犯而死。不但自戕其生。其孤負三寶之慈恩也甚矣。光聞訃。心爲之痛。念世之不知忌諱。致事。以致殞命者。其多無數。若不設法預爲防護。殊失如來慈悲救苦之道。擬取不可。訂之。排印廣布。以期舉世咸知忌諱。不致悞送性命。一居士以母氏遺資千六百元。

書施送。光令盡數印壽康寶鑑。以拯青年男女于未危。則以羅濟同一人之死。令現
來一切閱此書者。知所戒慎。并由展轉流通。展轉勸誡。庶可舉世同享長壽康寧。而鰥
獨之苦。况日見其少。如是則由濟同一人之死。令一切人各得壽康。濟同之死。爲有功
此功德。回向往生。當必俯謝娑婆。高登極樂。爲彌陀之弟子。作海衆之良朋矣。孟子曰。
者莫善于寡欲。其爲人也寡欲。雖有不存焉者寡矣。其爲人也多欲。雖有存焉者寡矣。
時尙宜節欲。况大病始愈乎。十年前一鉅商之子。學西醫于東洋。考第一。以坐電車。未
幾。跌斷一臂。彼係此種醫生。隨卽治好。凡傷骨者。必須百數十日不近女色。彼臂好未
幾。母壽回國。夜與婦宿。次日卽死。此子頗聰明。尙將醫人。何至此種忌諱。懵然不知。以俄
之歡樂。殞至重之性命。可哀孰甚。前年一商人。正走好運。先日生意。獲六七百元。頗得意。
日由其妾處。往其妻處。其妻喜極。時值五月。天甚熱。開電扇。備盆澡。取冰水加蜜令飲。唯
熱得涼。不知彼行房事。不可受涼。未三句鐘。腹痛而死。是知世之由不知忌諱。冒昧從
至死亡者。初不知其有幾千萬億也。而古今來福最大者。莫過皇帝。福大壽亦當大。試
之。十有八九皆不壽。豈非以欲事多。兼以不知忌諱。以自促其壽乎。而世之大聰明人。

每多不壽。其殆懵懵于此而致然乎。光常謂世人十分之中。四分由色欲而死。四分雖不由色欲直接而死。因貪色欲虧損。受別種感觸間接而死。其本乎命而死者。不過十分之一二而已。茫茫世界。芸芸人民。十有八九。由色欲死。可不哀哉。此光流通壽康寶鑑之所以也。願世之愛兒女者。以及爲同胞作幸福防禍患者。悉各發心印送。展轉流傳。俾人各悉知忌諱。庶不至悞送性命。及致得廢疾而無所成就也。彼縱情花柳者。多由自無正見。被燕朋淫書所誤。以致陷身于欲海之中。莫之能出。若肯詳閱。則深知利害。其所關於祖宗父母之榮寵。妻孥與自己身家之死生成敗。并及子孫之賢否滅昌。明若觀火。倘天良尙未全昧。能不觸目驚心。努力痛戒乎。將見從茲以後。各樂夫婦之天倫。不致貪欲損身。則齊眉偕老。既壽且康。而寡欲之人恆多子。而且其子必定體質強健。心志貞良。不但無自戕之過失。決可成榮耀之令器。此光之長時馨香以禱祝者。願閱者共表同心。隨緣流布。則人民幸甚。國家幸甚。

十六年丁卯季春常慚愧僧釋印光謹撰

不可錄重刻序 附

之禍。極其酷烈。自古至今。由茲亡國敗家殞身絕嗣者。何可勝數。卽未至此。其閒頹其

之軀。昏其清明之志。以頂天履地。希聖希賢之姿。致成碌碌庸人。無所樹立之輩者。又
何限。况乎逆天理。亂人倫。生爲衣冠禽獸。死墮三途惡道者。又何能悉知之而悉見之耶。
色之禍。一何酷烈。至於此極也。由是諸聖諸賢。特垂悲愍。或告之以法言。或勸之以巽
言。欲福善禍淫之理。舉世咸知。而又徵諸事實。以爲法戒。企知自愛者見之。當必怵然驚
悟。遇人欲于橫流。復天良于將滅。從茲一切同倫。悉享富壽康寧之福。永離貧病夭折
之禍。此不可錄所由輯也。張瑞曾居士。欲重刻印施。命余作序。暢演窒欲要義。須知美色當
戒。人心熾盛。法言巽語。因果報應。皆難斷其愛心。若能作不淨觀。則一腔欲火。當下冰消矣。
秦長安子弟。多玩促織。有兄弟三人。年皆成童。于月夜。捉促織于墳墓間。忽見一少婦。姿
色絕倫。遂同往捉之。其婦變臉。七竅流血。舌挖尺餘。三人同時嚇死。次日。其家尋得。救活者
一方。知其事。活者大病數月方愈。其家子孫。不許夜捉促織。夫此少婦。未變臉時。則愛入骨
髓。非遂所欲。則不可及。既變臉。則一嚇至死。愛心便成烏有。然當其羣相追逐時。固未始無
美舌也。何含而藏之。則生愛心。流而挖之。則生畏心。了此。則凡見一切天姿國色。皆當作
七竅流血。舌挖尺餘之鈞頸鬼想矣。又何至被色所迷。生不能盡其天年。死必至永墮惡道。

耶。以故如來令貪欲重者。作不淨觀。觀之久久。則尙能斷惑證真。超凡入聖。豈止不犯邪淫。望欲衛生而已。其女貌嬌美。令人生愛心而行欲事者。不過外面一張薄皮。光華豔麗。爲其所惑耳。若揭去此之薄皮。則不但皮裏之物。不堪愛戀。卽此薄皮。亦絕無可愛戀矣。再進而剖其身軀。則唯見膿血淋漓。骨肉縱橫。臟腑屎尿。狼藉滿地。臭穢腥臊。不忍見聞。校前少婦所變之相。其可畏懼厭惡。過百千倍。縱傾城傾國之絕世佳人。薄皮裏面之物。有一不如是乎。人何唯觀其外相。而不察其內容。愛其少分之美。遂不計其多分之惡乎。余願世人遣外相而察內容。厭多惡以棄少美。則同出欲海。共登覺岸矣。又當淫欲熾盛。不能自制之時。但將女陰作毒蛇口。以己陽納蛇口中。想則心神驚悸。毛骨悚然。無邊熱惱。當下清涼矣。此又望欲之簡便法也。釋印光撰

不可錄敦倫理序 附

夫爲大父。地爲大母。一切男女。皆天地之子女。皆吾之同胞。既是同胞。當盡友愛。保護扶持。以期各得其所。如是。則爲天地之肖子。無忝所生矣。既能保護扶持天地之子女。則天地必保護扶持于其人。令其福深壽永。諸凡如意也。倘或肆意橫行。欺陵天地之子女。則其折

壽滅門絕嗣一氣不來永墮惡道經百千劫莫復人身者乃自取其禍非天地之不慈
且勿論卽如妻女姊妹人各共有人若熟視己之妻女姊妹已則憤心怒氣卽欲毆擊
見人之妻女姊妹稍有姿色心卽妄起淫念意欲汗辱乎哉夫同爲天地之子女是吾同
胞若于同胞起不正念則是汗辱天地之子女欺侮同胞其人尙得自立于天地之間而猶
之爲人乎况夫婦之道與乎三綱五常男女居室人之大倫人之所以異於禽獸者以其
禽入倫也人若行蔑理亂倫之事則是以人身行禽獸事身雖爲人實則禽獸不如也何也
以禽獸不知倫理人知倫理知倫理而復蔑倫理斯居禽獸之下矣然一切衆生由淫欲生
其習偏濃須深隄防作親作怨作不淨想庶可息滅邪念而淳全正念矣怨與不淨前序
已明茲特約親而爲發揮冀諸閱者同敦天倫毋懷惡念四十二章經示人見諸女云想其
感者如母長者如姊少者如妹幼者如女生度脫心息滅惡念梵網經云一切男子是我父
一切女人是我母我生生無不從之受生當生孝順心慈悲心如是則尙保護扶持之不暇
何可以起惡劣心而欲汗辱乎明有一生患淫不能自制問于王龍溪龍溪曰譬如有人謂
汝曰此中有名妓汝可奉韓就之汝從其言則汝母女姊妹也汝此時一片淫心還息否曰

息矣。龍溪曰：然則淫本是空，汝自認做真耳。人果肯將一切女人作母女姊妹視之，則不但淫欲惡念無由而生，而生死輪迴亦當由茲頓出矣。不可錄一書，法語巽言之訓，福善禍淫之案，與夫戒忌之日期處所，一一畢示，其覺世醒迷之心，可謂誠且摯矣。維揚張瑞曾居士，稱人心切，卽爲刻行。命光發揮窒欲之要，因以怨以不淨，而敍其大旨。繼因其堂兄正勛逝世，擬以此功德薦其靈識，俾罪障消滅，福智崇朗，出五濁之欲界，生九品之蓮邦。因居士孝友之情，故復撰敦倫之序。祈見聞者各詳察焉。則幸甚幸甚。釋印光謹撰。

欲海回狂普勸受持流通序 附 民國十六年釋印光撰

天下有極慘極烈，至大至深之禍，動輒喪身殞命，而人多樂於從事，以身殉之，雖死不悔者，其唯女色乎。彼狂徒縱情欲事，探花折柳，竊玉偷香，滅理亂倫，敗家辱祖，惡名播于鄉里，毒氣遺于子孫，生不盡其天年，死永墮于惡道者，姑置勿論。卽夫婦之倫，儻一沈湎，由茲而死，何可勝數。本圖快樂，卒致死亡，縲寡苦况，實多自取。豈全屬命應爾哉。彼昵情牀第者，已屬自取其殃，亦有素不狎昵，但以不知忌諱，冒昧從事，致遭死亡者，亦復甚多。故禮記月令，謂房事也。古聖王愛民之忱，可謂無微不至矣。忌諱，壽康寶鑑詳言之俱。

善常謂世間人民十分之中。由色欲直接而死者。有其四分。間接而死者。亦有四分。以由色欲虧損。受別種感觸而死。此諸死者。無不推之於命。豈知貪色者之死。皆非其命。本乎命者。乃居心清貞。不貪欲事之人。彼貪色者。皆自戕其生。何可謂之爲命乎。至若依命而生。命盡而死者。不過一二分耳。由是知天下多半皆枉死之人。此禍之烈。世無有二。可不哀哉。可不畏哉。亦有不費一錢。不勞微力。而能成至高之德行。享至大之安樂。遺子孫以無窮之福蔭。俾來生得貞良之眷屬者。其唯戒淫乎。夫婦正淫。前已略說利害。今且不論。至于邪淫之事。無廉無恥。極穢極惡。乃以人身。行畜生事。是以豔女來奔。妖姬獻媚。君子視爲莫大之禍殃而拒之。必致福曜照臨。皇天眷佑。小人視爲莫大之幸福而納之。必致災星莅止。鬼神譴戮。君子則因禍而得福。小人則因禍而加禍。故曰禍福無門。唯人自召。世人苟于女色關頭。不能徹底看破。則是以至高之德行。至大之安樂。以及子孫無窮之福蔭。來生貞良之眷屬。斷送于俄頃之歡娛也。哀哉。安士先生欲海回狂一書。分門別類。縷析條陳。以雅俗同觀之筆。述勸誡俱摯之文。于古今不淫獲福。犯淫致禍之事。原原委委。詳悉備書。大聲疾呼。不遺餘力。暮鼓晨鐘。發人深省。直欲使舉世同倫。咸享福樂。各盡天年而後已。須知其書。雖爲

戒淫而設。其義與道。則舉凡經國治世。修身齊家。窮理盡性。了生脫死之法。悉皆圓具。若善爲領會。神而明之。則左右逢源。觸目是道。其憂世救民之心。可謂至深切矣。是以印光于民國七年。特刊安士全書板于揚州藏經院。八年又刻欲海回狂。萬善先資。二種單行本。十年又募印縮小本安士全書。擬印數十萬。徧布全國。但以人微德薄。無由感通。只得四萬而已。而中華書局私印出售者。亦近二萬。杭州漢口。俱皆仿排。所印之數。當亦不少。茲有江蘇太倉吳紫翔居士。念世禍之日亟。彼新學派。提倡廢倫廢節。專主自由愛戀。如決江隄。任其橫流。俾一班青年男女。同陷于無底欲海漩渦之中。遂發心廣印欲海回狂。施送各社會。以期挽回狂瀾。然衆志成城。衆擎易舉。懇祈海內仁人君子。大發救世之心。量力印送。并勸有緣者。徧流通。又祈父誨其子。兄勉其弟。師誡其徒。友告其侶。俾得人人知其禍害。立志如山。守身如玉。不但不犯邪淫。卽夫婦正淫。亦知撙節。將見鰥寡孤獨。從茲日少。富壽康寧。人各悉得。身家由茲清吉。國界于以安寧。穢德轉爲懿德。災殃變作禎祥。畢竟不費一錢。不勞微力。而得此美滿之效果。仁人君子。諒皆當仁不讓而樂爲之也。爰述大義。以貢同仁。

附錄

懿德堪欽

揚州甘泉縣志

元素昭揚州人。弱冠遊京師。已登舟矣。其友鄧某持酒送行。正

飲間忽擡一絕色女子至。鄧令拜昭曰：此女係僕與某部某大人所買之妾，乘君之便，祈爲帶去。昭再三不肯。鄧作色曰：君何如此其固執也！卽不能自持，此女卽歸于君，不過二千五百緡錢耳。昭不得已許之。時天已熱，蚊蟲甚多，女苦無帳，昭令同寢已帳中。由內河經數十日，至京，以女交店主娘，自持書訪其人。因問君來曾帶家眷否？昭曰：只我一人。其人勃然慍現于面，然以鄧某之書，勉令接女至家。至夜，方知女未破身，其人慍感不已。次日卽馳書報鄧，盛稱昭德，隨往拜昭，謂曰：閣下眞盛德君子也。千古少有，昨日吾甚疑之。蓋以小人之腹，測君子之心耳，慍感無旣。

○秦昭之心，若非了無人欲，渾全天理，與此絕色女子，日同食，夜同寢，經數十日之久，能無情欲乎哉？秦昭固爲盛德君子，此女亦屬貞潔淑媛，懿德貞心，令人景仰。因附于此，用廣流通。民國十六年丁卯，釋印光識。

壽康寶鑑目次 序一篇 附序三篇 共六頁

文帝戒淫文……………戒淫格言……………二之十一

戒淫聖訓……………邪淫十二害……………十一之十二

戒淫文……………四覺觀……………十二之十三

九想觀	十三之十四
勸戒十則	十四
戒之在色賦	十四之十五
福善案	十五之二一
禍淫案	二二之二八
悔過案	二八之三十
同善養生	三十之三二
發誓持戒	三二之三三
晉願文式	三三
保身立命戒期及天地人忌	三三之四十
保身廣嗣要義	四十之四二
翻自由結婚文	四二之四三
不可錄紀驗	四四之四五

解砒毒方 歙人蔣紫垣有祕方解砒毒立驗。然求之者必索重資。不滿所欲。則坐視其死。一日行醫鄰縣。中夜暴卒。見夢於居停主人曰。吾以耽利之故。誤人九命。死者訴於冥司。冥司判九世服砒死。今將赴輪迴。我賂鬼卒。求以解砒毒方相授。君爲我活一人。則我少受一世業報。若得遍傳濟世。君更獲報無量。言訖。嗚咽而去。曰。吾悔晚矣。其方以防風一兩。研末。水調服。並無他藥。又異談果信錄。載冷水調石膏。解砒毒如神。

壽康寶鑑 原名不可錄

訓飭士子戒淫文

文帝曰。天道禍淫。其報甚速。人之不畏。夢夢無知。苟行檢之不修。卽災殃之立至。嗟爾有衆。聽予訓言。惟惠迪吉。自古云然。不善降殃。昔人明戒。春秋之淫亂。皆敗國而亡家。風雅之刺。盡鴟奔而鵠逐。故逆理乃自戕其性。而貪淫卽自奪其名。人事一乖。天心盡怒。桂香上苑。非潔己者難邀。杏宴天恩。豈汚名者可得。予蒞文衡。嘗垂教示。奈士子止貪半晌之歡。罔惜終身之計。淫人人淫。交手爲市。業報慘酷。洗心者誰。吾於二八試闈。每多臨時去取。一筆勾削。只緣窺彼鄰妻。數字增加。端爲拒茲室女。欲聞平地之雷。莫起寸心之火。終年潦倒。豈負學苦文高。一世迍遭。悉是踰閑敗節。士人不察於所由。反或怨天而恨地。植來黃甲。只在心田。衣爾紫袍。總由陰隲。棘闈滿地皆神。文院三場有鬼。惜哉字字珠璣。忽遇燈煤落卷。悵矣篇篇錦繡。無端墨跡汚文。此時予實主持。孰謂蒼天無眼。榜發三元。爲有驚神之德。蓮開並蒂。旋聞墜蕊之凶。倘能持正而不邪。自爾名歸而祿得。特頒新諭。咸使聞知。現雖無科甲。然折福折壽。固無

二也。切勿作冒昧想。謂今不同昔。縱然有現。不至爲功名之礙。而任意所爲也。至禱。

戒淫聖訓

文帝垂訓曰。吾奉金闕至尊之命。於每月寅卯日。按行酆都地獄。考定天下有罪人民事實。見夫黑籍如山。皆是世人一生孽案。其間作惡多端。惟淫惡之報。天律最嚴。姦人妻女。玷人閨門。在地獄中。受苦五百劫。方得脫生。爲騾爲馬。又五百劫。乃復人身。爲娼爲優。設謀造計。姦宿寡婦尼僧。敗人操履。在地獄中。受苦八百劫。方得脫生。爲羊爲豕。供人宰殺。又八百劫。乃復人身。爲瞽爲啞。以卑亂尊。以長亂幼。敗壞綱常。在地獄中。受苦一千五百劫。方得脫生。爲蛇爲鼠。又一千五百劫。方得人身。或在母胎中死。或在孩抱中亡。畢竟不享天年。更有造作淫書。壞人心術。死入無閒地獄。直至其書滅盡。因其書而作惡者。罪報皆空。方得脫生。淫書之爲害。不可勝數。常有名閨淑媛。識字知文。或綠牕畫靜。或青燈夜闌。展卷視之。魂搖魄蕩。不禁慾火之焚。遽成奔竊之行。致節婦失節。貞女喪貞。更有聰明子弟。秀而有文。一見此書。遂起慾想。或手淫而不制。或目挑而苟從。小則斲喪元陽。少年夭折。大則瀆亂倫紀。不齒士林。若夫巧作傳奇。當場演出。教習嬖童。備示淫態。亂人清操。不可勝數。職其根由。皆淫書所致。奈何士子。以夙世之慧根。握七寸之斑管。不思有功於世。積福於身。徒造無窮之孽。干

上帝之怒自蹈於冰淵火坑而不恤深可悲也。

戒淫文

蓋聞業海茫茫。難斷無如色欲。塵寰擾擾。易犯惟有邪淫。拔山蓋世之英雄。坐此亡身喪國。繡口錦心之才士。因茲敗節墮名。今昔同揆。賢愚共轍。况乃囂風日熾。古道淪亡。輕狂小子。固耽紅粉之場。慧業文人。亦效青衫之溼。言望欲而欲念愈滋。聽戒淫而淫機倍旺。遇嬌姿於道左。目注千翻。逢麗色於閨簾。腸回百折。總是心爲形役。識被情牽。殘容俗嫗。偶然簪草簪花。隨作西施之想。陋質村蠶。設或帶香帶麝。頓忘東婦之形。豈知天地難容。神人震怒。或毀他節行。而妻女酬償。或汗彼聲名。而子孫受報。絕嗣之墳墓。無非輕薄狂生。妓女之祖宗。盡是貪花浪子。當富則玉樓削籍。應貴則金榜除名。笞杖徒流大辟。生遭五等之誅。地獄餓鬼畜生。沒受三途之罪。從前恩愛。到此成空。昔日雄心。而今何在。普勸青年烈士。黃卷名流。發覺悟之心。破色魔之障。芙蓉白面。須知帶肉骷髏。美貌紅妝。不過蒙衣漏廁。縱對如玉如花之貌。皆存若姊若母之心。未犯姪邪者。宜防失足。曾行惡事者。務卽回頭。更祈展轉流通。迭相化導。必使在在齊歸覺路。人人共出迷津。

戒淫格言

三丰張真人曰。人生天地間。稟五行之秀。具剛正之氣。夫夫婦婦。人道之常。越禮亂倫。等諸禽獸。淫邪之行。志士所當力戒也。夫天下蠢然者莫如物。乃雌鳩定偶而不相亂。哀雁孤鳴而不成行。人不如鳥。負此人名。遜物之靈矣。奈此蚩蚩之氓。不解色卽是空。同於幻泡。猶羨紅顏綠鬢。恩愛纏綿。豈知人同此心。反觀皆可自悟。爾等於淫人婦女時。當卽自思。設此時吾婦被人淫。枕畔戲笑。曲盡綢繆。吾介於其傍。見此種情形。當必心中如刺。眼內如火。奮擊追殺。刻不容緩。何至淫人婦女。忘卻回想。遽爾牽帷。自鳴得意乎。此時天地鬼神。臨之在上。質之在傍。其怨怒猶是。欲殺割猶是。有不瞋目切齒。謀爲報應者乎。災禍之起。至不旋踵。與言及此。能不寒心。又况捨身利劍。碎首鄰塔。陽臺之夢未終。而泉臺之局已掩。青燐碧血。皆紅粉之變爲之。美人原是胭脂虎。豈不信哉。卽不至此。而淫人妻者。強者鳴之當道。弱者隱恨終身。宗族含不解之羞。夫婦絕百年之好。死生莫測。變態多端。或陰圖報復。或暗地傷慚。祖父本無大咎。附會者卽猜爲極惡。至若夫若子若孫。世玷清名。移人骨肉。亂我宗祧。縱身登仕籍。名譽彰聞。終必遺臭無窮。既不齒於人倫。亦永傳爲話柄。是殺人之慘毒。止及一身。

而無刃之鋒鋸。不啻殺人數世也。總之淫念根於好色。欲絕淫根。先嚴色戒。一好色卽好淫。則己身不正。而對此柔姿媚骨。不能自制。必多爲彼所制。由是徇私情。廢孝友。父母兄弟。棄之不顧。舍此一好之外。懵然無知矣。由是妻妾子女。失所防閑。任其穢亂。閨闈。默爲報應。亦必懵然無知矣。且夫好淫者。子孫必至夭折。後嗣必不蕃昌。何則。我之子孫。我之精神。種之。今以有限精神。供無窮花柳。譬諸以斧伐木。脂液既竭。實必消脫。一己之精神。尙渙散而不積。又安望集於子身。則所生單弱。在所必然。至業已單弱。而父母之淫根不絕。稟氣受形。大率都肖。再傳而後。薄之又薄。弱之又弱。覆宗絕祀。適得其常。淫禍之烈。可勝言哉。嗚呼。人壽幾何。百年一瞬。縱不顧名節。不惜身命。未有不念及子孫。謀及宗祀者。苟一計及。方追悔不暇。有何娛樂。尙思逞慾耶。至於尼僧孀寡。僕婦青衣。娼家妓館。名分所關。身家所係。尤易明察。無庸多贅。是在有志者。清淨爲基。存誠爲用。堅忍爲守。決烈爲志。存之以不動。養之以湛如。舉凡誘人入罪。一切誨淫之書。付彼烈火。爲天下蒼生造福。狎淫之友。擯不與通。易吾好色之心。殫精會神。圖爲有益。將見何名不立。何利不收。而五福之休。畢集於我躬矣。是爲勸。

●汪舟次曰。諸惡業中。唯色易犯。敗德取禍。亦莫過此。常卽萬惡淫爲首一語思之。世間惡

業無窮。何至以淫爲最。蓋淫念一生。諸念皆起。邪緣未湊。生幻妄心。勾引無計。生機械心。少
有阻礙。生瞋恨心。欲情顛倒。生貪著心。羨人之有。生妬毒心。奪人之愛。生殺害心。廉恥喪盡。
倫理俱虧。種種惡業。從此而起。種種善願。從此而消。故曰萬惡淫爲首。夫一動淫心。未必實
有其事。已積惡造業如此。况顯蹈明行。罔知顧忌者乎。世有忠厚善人。而身後不昌。才士文
人。而終身潦倒者。其病皆由於此。今欲斷除此病。當自起念時。截斷病根。太上不言私美色。
而言見他色美。起心私之。蓋止一起心。而罪已不可逃矣。●殺人者止及一身。淫人者毒其
數世。不獨伊夫閨門不肅。終身難以對人。卽上而公姑。下而子女。莫不恥懸眉睫。痛入心脾。
更有夫怒而殺其妻。父怒而鳩其女。甚至因是而斬人子息。絕人宗祧。亦念片時娛樂。所得
幾何。而將良家妻女。無端誘入火坑。無論冥報彰彰。而此心抑何太忍。●孀居苦節。本是一
點貞心。鬼神欽敬。今乃眉來眼去。致他此心一動。不復自持。從前苦節。一時盡喪。罪大惡極。
莫此爲甚。至於破殘閨秀。無論醜聲揚播。人所共棄。卽或有人娶去。往往敗露。遂還父母。含
羞兄弟。負恥。因而氣忿。隕命者有之。抑鬱傷身者有之。人亦何憾於彼。而必爲此害人害己
之事哉。●婦女何知遠大。或因一時之愛慕。而願結鸞儔。或因年少之無知。而感懷腐誘。可

憐無瑕白璧。頓受塵翳。後雖終身抱悔。而此日之淫污莫滌。更有一朝被染。而畢生之廉恥皆忘。興言及此。實爲寒心。是以古之君子。雖彼攬袂相邀。牽幃相就。當不禁嚴莊拒絕。迴娥眉胥溺之狂瀾。婉轉開陳。示錦帳回頭之道岸。倘能收拾芳心。保全貞性。則數世之陰靈。皆被仁人之厚澤矣。●至若婢女僕婦。尤易行姦。不知此輩本屬良民。不過因難投充。以貧自鬻。奈何既役其身。又亂其性耶。況家政不肅。家道不和。大都由此。或妬妻鞭撻以傷生。或悍僕反脣以噬主。或父子不知而聚廳。或兄弟交迷而薦寢。甚者以骨肉胞胎。淪爲賤賤。後人無知。誤行褻狎。名爲主婢之分。陰有兄妹之戚。傷風敗俗。所不忍言。●又有假隨喜之行蹤。誘空門之豔質。敢污佛地。敗壞清修。此與尋常淫惡。定加百倍。●更有別種狂癡。漁獵男色。外借朋友之名。陰圖夫婦之好。彼既見鄙於衆人。我亦不齒於正士。等而下之。狎優童。昵俊僕。心因慾亂。內外不分。我既引水入牆。彼必乘風縱火。其間蓋有不可知者。●他如寄興青樓。自謂風流雅事。不知淫媚賤質。百種溫存。無非陷人鉤餌。一入其中。極聰明人。亦被迷惑。遂至亂其心志。廢其正業。破家蕩產。流入匪類。況遇屍癆之婦。瘡毒之妓。延染及身。脫眉去鼻。痛楚難堪。豈惟不齒於親朋。抑且見憎於妻子。卽良醫療治。獲全性命。而毒氣內傷。多致

不能生育。縱有生育。而先天毒盛。往往發爲異瘡惡痘。以致夭折。因此覆宗絕祀。嗟何及哉。

●顏光衷曰。少年欲心。何所不至。譬如口腹嗜味。愈縱愈狂。力自簡制。則味淡將去矣。又有肆邪說以鼓其欲。曰好色。非慧性男子不能。吁。鶉之奔奔求偶。狐之綏綏求媚。彼非其慧性哉。任我之欲而無禮。則禽獸何殊焉。且少年才士。染指良家。則陰譴殺禍可懼。恃財嫖蕩。則耗家惡疾可虞。漁獵男色。則辱人敗行可恥。何如漸忍漸戒。可以省些腸斷。積些陰德乎。有倡此蠱惑人者。罪應與此同科。

●由來縱慾導淫。莫甚於市井。聚談則無非閨閫。結伴則浪跡花街。無心偶盼。輒謂多情。中道相逢。便矜奇遇。以竊玉偷香爲趣事。視敗倫傷化若尋常。相扇成風。毫無顧忌。不知心無二用。花柳情深。必至拋荒生理。由是求利者資本漸消。幫人者生涯難保。且惡因日積。罪孽日深。顯則傾家蕩產。市中之拮据徒勞。陰則削祿減年。命裏之榮華盡喪。大則父母無依。肝腸暗裂。小則身名頓墮。流落堪嗟。甚至敗露觸凶。而七尺之軀。頃刻作刀頭之鬼。奈何彰彰淫禍。動曰迂談。而甘心流爲匪類哉。

●世人好於後生小子前。語及淫褻。以爲笑樂。彼年少無知。烏知利害。聞此欲念躍躍。由是鑿其未破之眞。竭其未充之髓。以致奄奄成疾。甚至夭亡。終身禍患。實由傍人之鼓舞始也。夫不能正言規戒。已非

益友。况又從而導之。拔舌地獄。當爲此等人設。●昔人謂閱淫書有五害。妨正業害一。耗精神害二。亂心志害三。或友人借看。則害友人。或子孫竊視。則害子孫。談淫穢有三罪。揚人醜。傷己德。褻天地神明。若能以身率物。或逢人觀看稗史。談及香閨。當援引貞淫果報。曉勸一切。或廣座危言。或密室苦口。無畏揶揄。無避迂腐。婉轉勸導。則千百人中。必有受其益者。近日淫詞小說。街坊賃賣者甚衆。凡淫穢難堪之語。不可形於齒頰者。公然筆之於書。卽就其尤雅者。亦無非偷會私期。敗名喪節之事。後來反得顯貴團圓。將中蕁之醜。說得毫無足怪。無知閨女。遂誤認爲佳人才子之事。由此喪貞失節。玷辱家風。萬年難洗。至於開小兒未萌之竇。啟村夫羨慕之心。種種禍害。不可殫述。更有春宮淫畫。尤屬導淫之階。此皆流毒人心之甚者也。居顯位有言職者。誠能嚴行禁止。搜刻板而盡燬之。其有裨於風化。豈淺鮮哉。●樂圃朱善曰。閨房之樂。本非邪淫。妻妾之歡。雖無傷礙。然而樂不可極。慾不可縱。慾縱成患。樂極生悲。古人已言之矣。人之精力有限。淫慾無窮。以有限之精力。資無窮之淫慾。無怪乎年方少而壽遽夭。人未老而力先衰也。况人之一身上承父母。下撫妻子。大之有功名富貴之期。小之有產業家私之受。關係非淺。乃皆付之不問。而貪一時之宴樂。不顧日後之憂危。

是誠何心哉。且寡慾者必多男。貪淫者每無後。蓋精力衰薄。養育難成。遂至子息單微。甚而後嗣滅絕。是其爲禍。可殫述哉。●周思敏曰。人生天地間。聖賢豪傑。惟其所爲。然須有十分精神。方做得十分事業。苟不知節慾以保守精神。雖有絕大志量。神昏力倦。未有不半途而廢者。●慾火焚燒。精髓易竭。遂至窒其聰明。短其思慮。有用之人。不數年而廢爲無用。而且漸成癆瘵之疾。蓋不必常近女色。只此獨居時。展轉一念。遂足喪其生而有餘。故孫真人云。莫教引動虛陽發。精竭容枯百病侵。蓋謂此也。●色是少年第一關。此關打不過。任他高才絕學。都無受用。蓋萬事以身爲本。血肉之軀。所以能長有者。曰精。曰氣。曰血。血爲陰。氣爲陽。陰陽之凝結者爲精。精含乎骨髓。上通髓海。下貫尾閭。人身之至寶也。故天一之水不竭。則耳目聰明。肢體強健。如水之潤物。而百物皆毓。又如油之養燈。油不竭則燈不滅。故先儒以心腎相交爲既濟。蓋心君火也。火性炎上。常乘未定之血氣。熾爲淫思。君火一動。則肝腎之相火皆動。腎水遭鑠。洩於外而竭於內矣。男子十六而精通。古者必三十而後娶。蓋以堅其筋骨。保其元氣。且血氣稍定。亦不至如少年之自耗也。近世子弟。婚期過早。筋骨未堅。元神耗散。未娶而先撥其本根。既婚而益伐其萌蘖。不數年而精血消亡。奄奄不振。雖具人形。旋

登鬼錄。此固子弟之不才。亦由父兄之失教。今爲立三大則。曰勤職業以勞其心。別男女以杜其漸。慎交遊以絕其誘。如此則內外交修。德業日進。而父兄之道盡矣。●欲戒淫行。必自戒淫念始。淫念起。則淫行隨之矣。然則何以制之。曰邪友不宜近。邪地不宜入。邪書不宜看。邪話不宜聽。蓋邪友一近。則益友日疎。自然漸染引誘。漸入下流。放僻邪侈。無不爲已。邪地一入。則正念難持。自然技癢心熱。把持不定。游移俄頃。悔恨終身。言念及此。可不戒諸。至邪書邪話。不過文人游戲。閒漢謔談。彼欲編成一事。自然說得美好團圓。要皆捏造虛誣。豈可信爲真實。若以爲偶觸無妨。焉能動我。則潛滋暗長。有隱受其害而不知者。總之守身之法。寧可過爲防閑。不可稍自寬縱。寧可人笑迂板。不可自命圓通。苟非致嚴於平日。能保無失於臨時哉。●趙鴻寶曰。色慾一節。說得硬。拿不定。一念稍疎。陷溺難返。念念堅忍。當境忽移。惟於平日。對先哲於簡編。置格言於座右。清心寡慾。胸中於禮法因果。確信不疑。偶動邪念。當下痛除。如此。則當境自能猛省。至於男女之際。務遠嫌於瓜李。雖係至親至厚。定須內外分明。一言一笑不苟。安心自然不萌動矣。此正本清源之法也。●凡人最易失足。只在豔冶當前。勃然難制之一刻。試思閉目不窺。坐懷不亂。不過片念能持。而可以登大魁。致顯位。光

祖考福子孫較之半世青燈黃卷。與他途積德累功者。事半功倍。又何苦以俄頃歡娛。棄蓋世之功名。博終身之荼毒哉。倘操守不嚴。縱情任意。彼粉白黛綠。轉眼成空。而由此奪算。由此滅祿。由此殺身。且命該富貴者。註貧賤。應有子者。罰無嗣。妻女有淫佚報。子孫受困窮報。種種惡業。不一而足。噫。悔已晚矣。●今人平居不知謹飭。或對子女而夫婦嬉笑。或畜媵妾而塗敷脂粉。或縱妻出外遊觀。或奴婢犯姦不禁。種種不肅。何以齊家。若寡慾清心。笑言不苟。內外有別。防閑有法。則閨門之內。雍肅如賓。有不令人愛敬者哉。●姚庭若曰。今人一身不淫。只了得一身事業。何如一勸十。十勸百。百勸千萬。並流布後世無窮。同證善果乎。猶如布種然。一升落地。報以石計。種無窮。生亦無窮。但須勤布。莫使田荒。又如傳燈然。一燈然。千燈皆然。燈無量。光亦無量。但自我傳。莫自我滅。人特未肯實心苦勸耳。倘謂勸人而人不應。是猶布種而種不生。傳燈而燈不明也。有是理哉。●王大契問蓮池大師。弟子自看師戒殺文。遂持長齋。惟是色心熾盛。不能滅除。乞師方便教誨。使觀欲樂。一如殺生之慘。答云。殺是苦事。故言慘易。慾是樂事。故言慘難。今爲一喻。明明安毒藥於惡食中。是殺之慘也。暗暗安毒藥於美食中。是慾之慘也。智者思之。●凡人見美色起邪心。種種惡心都生。惡心生而良

心死矣。惟於邪念勃發。不可遏抑之時。思一死字。或思己身患難疾苦事。則必淡然而止。否則思此女死後。腐肉朽骨。臭不可近。眼前色相。無非幻境。則必憬然悟。否則思吾愛此女。而毀其名節。卽穢同糞土。全其名節。斯珍如珠玉。便當矜之恤之。成全之。愈愛而愈不忍污。如是則必肅然敬。否則思吾圖片刻之歡娛。而折功名。削富貴。奪紀算。遭殺害。斬嗣續。敗聲名。皆由於此。如是則必猛然省。卽不然。則思羞惡之心。人皆有之。女子失節。只因一時之迷。迨見惡於父母兄弟。見棄於舅姑丈夫。見笑於鄰里親族。每致悔不可追。含怨殞命。更或苟合墮胎。母子俱斃。冥冥中怨魂。豈肯相捨。如是則必瞿然驚。又不然。則思女子背夫外交。夫且忍負。很毒甚矣。更何論乎外人。便當作豺狼看。作蛇蠍看。作勾魂鬼使看。作前生怨家看。如是則必惕然戒。視人之女。要想如己女之惡人犯。視人之妻。要想如己妻之怕人污。人當動念之始。深自警惕。曰。我淫人之妻女。設我之妻女亦被人淫。奈何。對面一想。則此心自然遏滅。此降火最速之藥。且犯人之女。己女未有不爲人犯者。污人之妻。己妻未有不爲人污者。不必證之於古。歷觀近時報應。天道真不差累黍。看已受報應的淫人。個個如是。便知未受報應的淫人。也是個個如是。古詩云。勸君莫借風流債。借得快來還得快。家中自有代還人。

你要賴時他不賴。旨哉斯言。喚醒夢夢不少。●吳澤雲曰。人自賦氣成形而後。最重者莫如生命。然未能養生。安知保命。既知保命。卽能養生。此不易之理也。乃近世人心不古。風俗澆漓。其最足戕賊人之生命者。要惟色爲巨。色猶刃也。蹈之則傷。色猶鳩也。飲之則斃。雖男女居室。爲人倫所不廢。苟不知制情止義。其中亦有殺身之虞。而人顧甘之如飴。漫無節制者。何哉。蓋由道德之心先亡。而邪淫之念遂因緣而起。當其年少氣盛。留戀狎邪。嘗以有用之精神。消磨於婦人女子之手。而不之惜。甚至鑽穴踰牆。視爲韻事。宿娼挾妓。自詡風流。甚或對妻孥而誨淫。向閨房而謔笑。因斯門風敗壞。倫紀喪亡。中菁新臺。貽羞內外。然彼猶以爲樂。而不以爲苦焉。迨至陷溺已深。精枯髓竭。志氣因之墮落。耳目因之贖聾。形骸因之瘠羸。人格因之卑下。而一切虛弱癱瘓之病。又復乘隙而叢生。以致一身無窮之事業。絕大之希望。均消歸於烏有。卒之命殞中年。名登鬼錄。且或死不得所。而害及子孫者。要皆未節色慾之過也。其真以生命爲兒戲哉。●人於錢財。錙銖計較。百計營求。量入爲出。猶恐不繼。有浪用不節者。指爲敗子。夫財乃外至之物。猶珍重若此。若精液之可貴。非特錢財也。淫慾之所傷。非特錙銖也。財盡則窮。精盡則死。而乃恣意縱慾。毫不知惜。一旦精竭髓枯。水乾火熾。醫

藥罔效。悔之晚矣。蘇東坡云。傷生之事非一。而好色者必死。人之一身。神以御氣。氣以化精。精神充實。百骸強壯。足以有爲。若淫慾無度。則精竭氣耗。神不守舍。疾病殒亡。職此之由。可不慎歟。●身體髮膚。受之父母。不敢毀傷。孝之始也。夫毀傷云者。豈戕手折足之謂哉。有如嘉樹初生。發榮滋長之際。必戒勿剪伐。朝培夕護。然後可冀其成陰。人當成童。婉變之日。筋力未充。血氣未定。而先喪真元。以致形體枯羸。菁華銷鑠。百病叢生。父母相對。驚惶束手。無措。此姑無論陰隲所關。減齡削算。卽奈何以自作之孽。貽二親以無涯之隱痛。古之人一跬步不敢忘父母。以其遺體行殆。況玷其清白乎。其爲不孝。孰大於是。●輕薄少年。至親友家。輒窺內室。或傾耳竊聽。道逢佳麗。停趾凝矚。尾綴其後。訪其氏族。甚至以所見與同儕肆口嘲評。試問此何心也。蘧伯玉不以冥冥墮行。司馬溫公生平無一事不可對人言。而於白晝之時。衆人屬目之地。傲然出之。恬不爲怪。輕薄如此。尙不入端人正士之目。而謂不干鬼神之怒者乎。交游中有此等輩。早宜斥絕。不可與一日居也。●畢忠告曰。方今世界之愈形黑暗污濁。青年子女之益多敗節喪身者。推其故。皆發端於淫書淫畫之流毒也。竊觀近年新出版之豔情淫書淫畫。每出一書。不知害了幾百千人。在著作者。往往自圓其說。謂揭破黑幕。不知反釀導淫之法。歷來懸禁淫書。有陽奉陰違。暗中出售者。實

塔浩 不知凡幾。層出不窮。觸目皆是。少年子女。見報端所載之目錄告白。已五花八門。說得

形容盡致。意動購閱。不免同伴傳觀。致使目醉心迷。神魂顛倒。膽怯者不敢輕於嘗試。然身

體已無形受耗折矣。膽潑而意不自持者。若一失足。小則失業失學。耗精耗神。人身三寶。精

此則根本已喪。廢病隨之。那得長命乎。大則傾家喪命。絕嗣斷宗。當此之時。悔已無及。滬上黑暗淫風。甚於他

埠。試觀藏垢納污。引人入罪之地。到處皆是。耳濡目染。平日之志定自重者。尙不免受損友

之慫恿失足也。吾故曰。淫書淫畫。實殺人之利刃。惟願青年子弟。閨閣少女。遇此等淫書。撕

毀勿閱。遇此等損友。擯棄勿面。尙望互相警戒。勿蹈無形之殺人危機也。我今九頓首於出

版界。著作界之前。曰。誰無子弟。誰無妻女。而忍令其入黑暗。陷死亡。斷宗絕嗣乎。我又九頓

首於各校長。各家長。各號經理之前。曰。務各隨時嚴行稽察。循循勸導。使各青年子女。出黑

暗。免死亡也。而其源則仍在於出版界。著作界之好行其德也。倘採及芻蕘。竟毀版而絕筆

焉。吾知其子弟妻女。必爲共和國之大偉人。大閫範也。倘謂淫書中。寓有惡果報。閱者自能

警惕。試問何冊淫書。不寓果報之說。何以只見閱者之沈淪陷溺乎。我又拜手稽首於作豔

情之著作家。繪淫畫之美術家之前。曰。椽筆輝輝。何求不得。何苦自畱污點。自累盛名。引社

會於黑暗。陷人民於死亡。所博者祇蠅頭之微利耳。陰騭因果之說。雖爲時流所罕言。然五經四書。古今通人。各皆發揮提倡。豈以時流不信。遂致無有乎哉。惡業之中。淫惡爲最。生前暗中獲種種折福折壽。滅子絕孫之報應。死後靈魂必永受痛苦。凡我同胞。能不觸目驚心。敬求滬上慈善長者。如不以鄙言爲謬。開會集議。妥籌勸導之法。不獨造福一方。而德風所被。人各景從。則天下同胞。咸受恩澤。不禁馨香百叩禱之。●黃孝直曰。論語云。少之時。血氣未定。戒之在色。聖人之於色。無時而不戒也。禮。庶人非五十無子。不娶妾。其不二色可知。男子三十而娶。其不雜色可知。諸侯不娶境內。其不奪人之妻可知。先王以分至日閉關。其清心寡欲可知。乃孔子概不之及。特提出少之時血氣未定。戒之在色一語。誠重之也。抑畏之也。蓋人之方少。猶草木之始萌也。百蟲之在蟄也。草木當始萌之日。而卽摧其芽。未有不枯槁者。百蟲當藏蟄之會。而忽發其局。未有不死亡者。聖人提醒少年。使其力制色心。悚然自愛。以保養柔嫩之軀。少年時能於此色慾一關。把得牢。截得斷。他年元神不虧。氣塞兩間。立朝之日。精神得以運其經濟。作掀天事業。眞人品眞學問。皆由於此。卽使不成大器。亦必克盡其天年。不致死於非命。此少年所當猛省也。●父母愛子甚切。自幼無不管教。惟至色

慾傷身大事。則多不甚明切訓誨。推原其故。蓋因未婚時。以爲子弟知識未開。不可明言。及既娶後。又以子弟已壯。兼礙媳面。不便盡言。不知子弟年輕。閱歷未深。凡古今好色必死之事。未經目覩。見不甚相信。又不能詳讀遠色戒淫之書。兼聽匪友荒唐之語。每將房事。視爲樂境。遂至傷身斃命。因以絕後者。不可勝數。良可嘆息而墮淚也。爲父母者。須於子弟十四五歲時。先於暗中。察其動靜。省其嗜好。如知識已開。則於易換衣褲時。密爲周視。察有遺精斑漬。急須援引古訓。與之明言。詳告以好色必死之理。引證以好色已死之人。令子弟自知畏懼。卽能保養精神。及既娶後。尤須不憚煩碎。婉爲開導。父勉其子。婆勉其媳。急須將遠色戒淫各書。爲媳講解。令媳私下規勸其夫。萬不可懶於一時。礙於情面。而遺終身之痛也。

●淫禍最大。不止邪緣。卽妻妾欲事稍過。或獨寢心想欲事。皆足致疾喪身。不可不戒。道書有曰。人生慾念不興。則精氣舒布五臟。榮衛百脈。及慾念一起。慾火熾然。翕撮五臟。精髓流溢。從命門宣洩而出。卽尙未洩出。而慾心旣動。如以烈火燒鍋內之水。立見消竭。未幾則水乾而鍋炸矣。此慾念尤足傷身之實據也。吾願世人有病自療。唯在正其心而主於敬耳。●

少年新婚之日。慾念正盛。若不爲之節。往往種死根而促其茂齡。此甚可痛也。昔有一士。婚

後赴試。覺孤枕爲苦。未畢遽歸。一日走百餘里。二鼓抵家。其父怒曰。是必在郡生事。懼禍逃歸者。命縛而置諸空倉。疾呼覓杖曰。明日當痛笞之。明日父徐起釋之。亦弗問也。其子初歸。興甚濃。突遭斥辱。惴惴終夕。既釋。終莫喻父意。時有一友。與之偕歸。翌日死矣。蓋以百里行房而精脫也。始悟父縛之之故。古稱事親者視於無形。聽於無聲。抑知父母之愛子。乃真有視聽於形聲之外者乎。噫。家室猶然而況履蹈危機。風露侵逼於外。驚恐交戰於中。更有什伯於是者。人子知此。體親之心以爲心。則壽康可得矣。●黃書雲云。邪淫者。凡屬他人之妻女。我以邪心犯之者皆是。卽己之妻室。而犯之非其時。經期、孕月、產後、乳哺、時、疾病中、齋戒日、非其地。非交合之處所、或於其身有生死之關係。或於其日犯人神之禁忌。或於其體失交合之正理。或於其日屬神聖之誕期。皆邪淫也。至於娼妓。以宿世惡業。致墮此中。宜生憐憫。乃反幸其下賤。恣行淫穢。其損德招報。誠堪畏懼。若犯幼童。姦處女。亂寡婦。汗尼僧。是乃禽獸所不爲。人神所同嫉。天津所不容者。尤爲罪大惡極。所當惕然省。悚然畏。戒慎自持。戰兢勿犯者也。又或交及禽獸。亂至倫常。此爲口之所不忍言。乃成事之所竟。或有嗟乎。人心之壞。至於此極。豈止淪於禽獸。殃及子孫耶。感應篇以見他色美。起心私之爲有罪。起心猶不可。况見諸實事。習爲故

常者乎。夫古人有獻女不納者。而我乃百計以圖之。古人有昏夜拒奔者。而我乃強逼以汚之。古人有捨金還妾者。而我乃多方以挑之。古人有措資嫁婢者。而我乃恃勢以姦之。古人有贖賤爲良者。而我乃乘危以脅之。古人有捐金完人夫婦者。而我乃離間以奪之。古人有出財助人嫁娶者。而我乃陰險以破之。隱之爲閨閣之羞。顯之係全家之辱。小之亦終身之恨。大之成性命之憂。生則負疚於神明。而無以對其丈夫父母兒女。死則沈淪於惡道。而相連以入於地獄。餓鬼畜生。我之罪誠不可逃。而彼之怨終未能解。馴至生生世世。久爲業緣。子子孫孫。受其慘報。頃刻之歡娛有限。多生之罪累無窮。總由妄認空花。遂沈慾海。風流孽債。何忍結之。須是識得破。忍得過。若是忍不過。仍是識不破耳。故見人妻女。當作自家眷屬想。其長者視如母。壯者視如姊。少者視如妹。如女。則淫心便無由而起矣。華嚴經曰。菩薩於自妻常自知足。自己之閨房。淫慾過度。猶不可。而敢亂他人妻女乎。速報錄云。我不淫人婦。人不淫我妻。冥律云。姦人女者。得絕嗣報。姦人妻者。得子孫淫泆報。古今罪案。見於戒淫寶訓。感應陰騭諸書。注案者多矣。可不畏乎。須知色相本空。嬌姿如幻。畫瓶盛糞。錦袋藏刀。每當暗室閒居。莫生妄想。即使邪緣湊合。勿喪良心。惟以慧力照之。正念持之。當念自心之良。

知炯炯然其在我也。虛空之鬼神森森然其鑒我也。頭上之三台北斗赫赫然其臨我也。家中之竈神。身上之三尸。凜凜然其伺我也。天堂之福樂。一轉瞬而可登。地獄之苦輪。一失足而將入。臨崖勒馬。苦海回頭。於萬難自持之時。存一萬不可犯之想。文昌帝君遏慾文。鍾離祖師戒淫歌。當熟讀而力守之。勿造隱昧之業。勿爲敗德之行。勿以娼優爲賤人。而弗加憐憫。勿以僕婢爲卑下。而不與保全。勿以淫奔爲自來。而失身蹈火。勿以妻妾爲家飯。而縱慾傷生。勿忘長幼之名分。而紊綱常。勿污尼僧之淨行。而觸神怒。勿紊人禽之界。而與毛羽爲緣。勿於仇怨之家。而以閨門洩忿。勿看淫詞豔曲。以啓邪心。勿談美色淫聲。以惑人意。除自犯外。凡引誘良家子弟淫蕩。及好談閨闈。編作淫書。摸寫淫畫。以啓人情竇者。爲教人邪淫。見聞人欲犯淫。而歡喜贊成者。與自犯同。楞嚴經曰。十方如來。色目行淫。同名慾火。菩薩見欲。如避火坑。若不斷淫。修禪定者。如蒸沙石。欲其成飯。經百千劫。只名熱沙。若刻實論之。卽不必實有其事。而苟有一念之私。已犯萬惡之首。蓋恒性降自維皇。元命賦自父母。見美色而起淫心。則客感奪其恒性之主。維皇所降者。便褻瀆一次。卽大不忠也。忠從中心。不欺之謂。自欺欺天。故爲外誘搖其元命之根。父母所賦者。卽虧損一次。卽大不孝也。蓋以性不離命。命不離性。動

一次淫欲，便耗一次理氣，卽丟一次性命，卽犯一次首惡矣。噫！紅顏之白圭未玷，而青年之黑籍已增。故君子先以正心清其源，次以寡慾養其德。何敢恣情縱欲，悖天蔑理，馴至折福減祿，短壽貽殃也乎。華嚴經曰：邪淫之罪，亦令衆生墮三惡道。若生人中，得二種果報：一者妻不貞良，二者得不隨意眷屬。語曰：世上無如人欲險，幾人能不誤平生，可哀也夫。

邪淫十二害

冒起宗，註感應篇見他色美，起心私之，二句云：見他人妻女之美貌，便起了好邪的私心。這一個念頭一起，雖無實事，已難逃鬼神的禍罰。蓋萬惡淫爲首，愚人不知利害，作此罪孽，今試講種種禍害，指醒迷途。一害天倫，男女各有配偶，這是天定的倫，亂了他，不要講到他們情義乖離。他的倫，我去亂了，便與禽獸披毛帶尾，是無別的。戴帽穿衣，豈可做此事乎。一害人節，婦女一生大事，只重節字，亂了他，使他失節，瓦破豈能再完。一害名聲，憑你機密，無人不知，臭聲遠播，供人傳笑，就是他的親戚，也是面覺無顏。一害門風，羞辱他父母公婆，羞辱他丈夫，及兄弟姊妹，羞辱他子女孫媳，一門中恥掛眉額，痛纏心骨，實是殺他三代了。一害性命，或婦女因受氣致死，或其夫憤死，或夫殺妻，或父殺女，或婦殺夫，或夫殺奸

人或奸人被衆打死。或婢女因妬妻致死。一害風俗。鄰里中有這廉恥喪盡人面獸心的人。愚人看了榜樣。朋比爲奸。最足傷風敗俗。這種惡習。定遭劫數。這六樣害。是害人的。一害心術。淫念一生。種種惡念都生。如幻妄心。貪戀心。機心。妬心。牽纏不住。意惡最重。一害陰隲。隲是定說。上天冥冥中有安定人的道理。就是本善的性。做人的胎元。今亂了常道。敗德喪行。傷天理。滅良心。斲削了陰隲的理。便要墮入地獄畜生的惡道。一害名利。感應篇說。三台北斗。三尸竈神。隨身察過。那有夜深人靜。上天不知的理。歷看果報。如李登犯了。削去狀元宰相。宜興木客某犯了。黑虎銜他頭去。命該富貴。也要削盡。况福分淺薄。狼狽何堪。一害壽命。鬼神削奪人壽。淫惡爲最。况且慾火焚燒。精神竭。骨髓枯。又或驚恐死。勞瘵死。惡瘡死。好色必死。早年短折。一害祖父。祖父相傳的血脈。拋在那里。這最是忤逆路頭。并一生的福分削盡。從此敗家聲。絕祭祀。陰間祖先。當作餒鬼了。能不恨極。一害妻子。佛經說。無有子息。亂人妻故。妻女淫亂。亂人室女故。把妻女去還債。又絕了後嗣。這不但看書上的果報。試看故世的淫人。個個這樣。便知未故世的淫人。也是個個這樣的。這六樣害。是害己的。以上十二害。都從格言因果中來。更兼日觀時事。望我同志。豫把禍患認清。庶

不臨時迷昧。前賢說。這一關要忍。要堅忍。要很忍。又說常想病時死日。邪念便消。又說早夜點香一炷。靜坐半時。使心猿意馬。漸漸調伏。依這三說。更把十二害。日日看看。時時想想。便是戒邪淫的良法。況如唐臯。羅倫。謝遷。王華的科甲。只因力拒奔女。趙秉忠。周旋。馮京的貴顯。只因其父不犯邪淫。片刻間關係禍福。豈不極大。這他字。包括婢女僕婦在內。昔文帝重降陰騭文說。香幃私婢。繡榻憇奴。俱膺必誅之律。人同一體。都是不該犯的。要知善人終身不貳色。視老如母。視長如姊。視少如妹。視幼如女。他來就你。終要力拒。守定了遠邪十法。一清心地。二守規矩。三敬天神。四養精神。五勿目看。六戒談穢。七燒淫書。八省房事。九勿晚起。十勸共戒。前人有戒邪淫單式刻送。內說每領一單。勸十人。寫名簽押。具疏神前。共誓戒淫。這法最好。單式也是易做的。

四覺觀

此觀成時。深知彼我同具陋質。是為隨境除貪方便門。

凡夫姪欲念。世世常遷徙。宿生爲女時。見男便歡喜。今世得爲男。又愛女人體。隨在覺其污。愛從何處起。

睡起生覺第一 默想清晨睡起。兩眼朦朧。未經盥漱。此時滿口粘膩。舌黃堆積。甚是污穢。

當念絕世嬌姿。縱具櫻桃美口。而脂粉未傅之先。其態亦當爾爾。

醉後生覺第二 默想飲酒過度。五內翻騰。未久忽然大嘔。盡吐腹中未消之物。餓犬嗅之。搖尾而退。當念佳人細酌。玉女輕餐。而杯盤狼藉之時。腹內亦當爾爾。

病時生覺第三 默想臥病以後。面目鰲黑。形容枯槁。又或瘡癰腐潰。膿血交流。臭不可近。當念國色芳容。縱或年華少艾。而疾苦纏身之日。形狀亦當爾爾。

見爾生覺第四 默想通衢大廁。屎尿停積。白蠟青蠅。處處繚繞。當念千嬌百媚之姿。任彼香湯浴體。龍麝熏身。而飲食消融之後。所化亦當爾爾。

九想觀

此觀成時。方悟身後無量。悽慘是為返終。絕愛方便門。

人想死亡日。欲火頓清涼。愚人若聞此。愁眉歎不祥。究竟百年後。同入燼燬場。菩薩九想觀。苦海大津梁。

新死想第一 靜觀初死之人。正直仰臥。寒氣徹骨。一無所知。當念我貪財戀色之身。將來亦必如是。

青瘀想第二 靜觀未斂骸屍。一日至七日。黑氣騰溢。轉成青紫。甚可畏懼。當念我如花美

貌之身。將來亦必如是。

膿血想第三 靜觀死人初爛。肉腐成膿。勢將潰下。腸胃消糜。當念我風流俊雅之身。將來亦必如是。

絳汁想第四 靜觀腐爛之屍。停積既久。黃水流出。臭不可聞。當念我肌膚香潔之身。將來亦必如是。

蟲噉想第五 靜觀積久腐屍。徧體生蟲。處處鑽嚙。骨節之內。皆如蜂窠。當念我鸞儔鳳侶之身。將來亦必如是。

筋纏想第六 靜觀腐屍。皮肉鑽盡。止有筋連在骨。如繩束薪。得以不散。當念我偷香竊玉之身。將來亦必如是。

骨散想第七 靜觀死屍。筋已爛壞。骨節縱橫。不在一處。當念我崇高富貴之身。將來亦必如是。

燒焦想第八 靜觀死屍。被火所燒。焦縮在地。或熟或生。不堪目擊。當念我文章蓋世之身。將來亦必如是。

枯骨想第九 靜觀破塚棄骨。日暴雨淋。其色轉白。或復黃朽。人獸踐踏。當念我韶光易邁之身。將來亦必如是。

勸戒十則

閨秀豈容玷辱。一生名節攸關。六親體面沒遮欄。結定怨家不散。縱使臨婚瞞過。隱含羞恥難安。痛纏心骨。怨如山。蒙垢千秋莫澣。處女

人孰不思偕老。可憐獨守空房。芳池拆散兩鴛鴦。此後雙飛絕望。死者別無餘願。祇求爲我增光。智欺勢壓太猖狂。終作怨家孽障。孀婦

有女皆期得所。守貞待字于歸。只因窮困兩相違。骨肉親情如水。莫認塔前之草。休貪席上之杯。百年難保舊門楣。祇恐後嗣不美。婢女

僕婦雖然下賤。含羞帶恥人同。入牢無奈強相從。罪惡一般深重。彼自分明配偶。我當嚴整家風。從來義僕幹奇功。都是主恩感動。僕婦

他既爲我鞠子。吾寧因子姦他。終年琴瑟遠違和。祇爲家貧難過。況彼良人在室。望他守節心多。自羞自恨痛如何。勸爾早些看破。乳嫗

貧窘甘心忍辱。端須仁者保全。逞財乘急肆淫姦。作孽終身不淺。窮富由來無定。家資聚散如煙。阿誰能買子孫賢。只恐後來難免。貧婦

彼既修行出世。豈容覓趣調情。敗他戒行壞他名。不顧佛家清淨。神目赫然如電。地方借隙相乘。官刑冥罰禍非輕。真是墮身陷阱。尼姑

有種青樓妓女。倚門百媚天斜。須知君子愛身家。執玉一般恐怕。彼自落花無主。我終白璧蒙瑕。破傷財物悞生涯。染毒罹疴禍大。娼妓

娶妾祇因嗣續。何須少艾重重。脂紅粉白鬻骸工。總是一場春夢。每見富翁多寵。糟糠冷落閨中。隨時取樂逞淫風。性命攸關實重。姬妾

男女居室正理。豈容顛倒陰陽。汚他清白暗羞愴。自己聲名先喪。浪費錢財無算。戕生更自堪傷。請君回首看兒郎。果報昭昭不爽。男色

戒之在色賦 以題爲韻

蕩蕩情天昏昏慾界。智慧都迷。癡呆難賣。亦念夫夫婦婦。正家道以無乖。庶幾子子孫孫。肅關門而勿壞。如何鑽穴。絕無煩蛺蝶之媒。竟至踰牆。償不了鴛鴦之債。萬惡以淫爲首。曾榜

森羅百殃悉降於身。非徒天瘵。削他桂籍。生前則窮巷空悲。斬爾椒條。死後之荒塋孰拜。個個中庸記得。九經忘遠色之經。人人論語讀完。三戒昧少時之戒。血氣多緣未定。智愚那得不移。和也者。財先可餌。強乎哉。力莫能支。刑於寡妻。破節而故夫暗泣。摟其處子。含羞而新婦羣疑。以傭嫗爲易姦。麀而忽聚。以乳娘爲可犯。蠱豈堪醫。美婢調來。獅吼之威。教徧受。頑重比及。龍陽之醜。更難知。帶肉骷髏。偏喜狎顛狂之妓。低眉菩薩。亦怒汚清淨之尼。傳曰。男有室。女有家。毋相瀆也。禮云。內外亂。禽獸行。則必滅之。則有舌上燦花。毫端錯彩。誘人顛墜於邪山。罰爾沈淪於苦海。自詡文人才子。風流之趣。語頻翻。遂令怨女曠夫。月下之佳期。早待。好談中葺。一言傷天地之和。妄著淫書。萬劫受泥犁之罪。演出橫陳之劇。聲音笑貌。誰則弗思。描來祕戲之圖。袒裊裸裎。焉能不洩。酣歌艷曲。魂已蕩而魄已消。僞造仙方。陽可補而陰可采。是皆導入三途。能不孽添百倍。放鄭聲而有訓。此語應聞。思魯頌以無邪。其言猶在。何勿念淫。轉而好德。無思乃保無爲。有物本來有則。想到懸崖撒手。慾火難紅。急從彼岸回頭。狂瀾勿黑。過而能改。福尙可以自求。善更能遷。禍定消於不測。綠衣引去。洪學士之上壽。還登黃紙標來。項秀才之高魁。旋得出乎爾。反乎爾。報應分明。不可道。猶可違。挽回頃刻。罪

不加懺悔之人。夢已入清涼之國。非禮勿動。衾影中浩浩其天。反身而誠。倫紀中賢賢易色。樂爾妻孥。畢其嫁娶。夭桃各咏于歸。少艾焉容外慕。鸞幃夢暢。提頭而人面模糊。鳳管詞新。拔舌而鬼形恐怖。戒得心中如鐵。法網詎羅。色原頭上從刀。殺機已露。生貪有限之歡。沒受無窮之苦。能忍堅忍很忍。便致神欽。視淫意淫語淫。都防天怒。奔還要拒。風清月白之吟。烈更須揚。露峽雪江之句。自己閨房之樂。亦莫常耽。他人牀第之言。胡堪輕訴。青樓薄倖。休教縱慾三年。白璧無瑕。祇在閑情一賦。 閩商子拜亭。越中名士也。一夕夢文昌帝君謂之曰。子有賦才。曷不作戒色賦一篇。爲我喚醒世人。醒而爲之。下筆似有神助。字字窮形盡相。相言言恍目驚心。願天下文人才士。低徊往復之。

福善案

明宣德中。曹文忠公鼎。以歲貢授學正。不就。改泰和典史。因捕盜。獲一女於驛亭。甚美。意欲就公。公奮然曰。處子可犯乎。取片紙書曹鼎不可四字。焚之。天明召其母家領回。後大廷對策。忽飄一紙墮几前。有曹鼎不可四字。於是文思沛然。狀元及第。●餘杭陳醫。有貧人病危。陳治之痊。亦不責報。後陳因避雨過其家。其姑令婦伴宿以報恩。婦唯唯。夜深就之。曰君救

妾夫。此姑意也。陳見婦少而美。亦心動。隨力制之。自語曰。不可。婦強之。陳連曰。不可。不可。坐以待旦。最後幾不自持。又大呼曰。不可。二字最難。天明遁去。陳有子應試。主試棄其文。忽聞呼曰。不可。挑燈復閱。再棄之。又聞連聲呼曰。不可。不可。最後決意棄之。忽聞大呼曰。不可。二字最難。連聲不已。因錄之。榜後召問故。其子亦不解。歸告父。父曰。此我壯年事也。不意天之報我如此。●馮商。壯年無子。妻每勸其置妾生男。後如京師。買一妾。成券償金矣。問女所自。涕泣不能言。固問之。曰。父因綱運負欠。鬻妾以償。馮惻然。亟還其父。不索原銀。歸妻問妾安在。具告以故。妻曰。君用心如此。何患無子。閱數月。妻娠。將誕之夕。里人皆見鼓吹喧闐。送狀元至馮家。是夕生兒。卽馮京也。後中三元。官至太子少師。相業甚盛。●明無錫孫繼臯。館於某家。主母遣婢送茶一杯。杯中一金戒指。孫佯爲不知。令收去。是夜婢來叩門。云主母到矣。公急取大板。頂門不納。明日遂歸。人間故。曰。生徒不受教也。終不露其事。後大魁天下。子孫貴顯。●温州周旋之父。多子而貧。鄰人富而無子。令妾與之乞種。夜招飲。其夫佯醉而出。妾出陪。告以故。旋父愕然。遽起而門已閉。迺以手書空曰。欲傳種子術。恐驚天上神。面壁不顧。正統乙卯。旋中鄉榜。太守夢迎新狀元。卽旋也。彩旗上大書欲傳種子術。恐驚天上神。太守

莫測其故。丙辰果中狀元。太守稱賀。因述夢中所見。父曰。此老夫于二十年前書空語也。終爲諱之。●明太倉陸公容。美丰儀。天順三年。應試南京。館人有女。夜奔公寢。公給以疾。與期後夜。女退。遂作詩云。風清月白。夜牕虛。有女來窺笑。讀書欲把琴。心通一語。十年前已薄相如。遲明託故去。是秋中式。先時公父。夢郡守送旗匾鼓吹。匾上題月白風清四字。父以爲月宮之兆。作書遺公。公益悚然。後成進士。仕至參政。●毗陵有錢翁者。行善乏嗣。里中喻老。爲勢家索逋。負械不決。妻女凍餒。求貸於翁。翁如數與之。不收文券。事解。喻挈妻女踵謝。翁妻見女色美。欲聘爲妾。喻夫婦欣然。翁曰。乘人之難。不仁。本意作善。而以慾終。不義。吾寧無子。決不敢犯。喻夫婦拜泣而退。翁妻是夕。夢神謂曰。汝夫陰德隆重。當錫汝貴子。踰年。果生子。名天賜。十八歲聯捷。官至都御史。●歸安沈桐。字觀頤。家貧。族兄遜洲。薦至姻家訓蒙。婦孺子幼。一夜婦私奔焉。桐峻拒之。次日卽辭歸。婦恐語洩。備禮敦請。又促遜洲往邀數次。不赴。屢詰其故。桐終不言。但曰。不便而已。次年聯捷。官至巡撫。●徽商王志仁。三十歲無子。有相士謂其十月當有大難。王素神其術。因亟往蘇。斂貲歸寓。晚偶散步。見一婦投水。王急取十金。呼漁船救之。問故。婦曰。夫傭工度日。畜豕償租。昨賣之。不億。皆假銀也。恐夫歸見責。無

以聊生。故謀死耳。王惻然，倍價周之。歸語其夫，夫不信。迺與婦共至王寓質焉。王已寢矣，婦叩門呼曰：「投水婦來謝。」王厲聲曰：「汝少婦，吾孤客，昏夜豈宜相見？」夫悚然曰：「吾夫婦同在此，王乃披衣出見，纔啟戶，牆忽傾倒，臥榻已壓碎矣。夫婦感歎而別。後歸家，遇相者大駭曰：子繡面陰隲紋現，是必曾救人命，後福未可量也。後連生十一子，壽九十六，尙康健。」●宋楊希仲，新津人，微時館成都富家，有一美妾，自負才色，詣館調戲，希仲正色拒之。其妻是夕夢神告曰：「汝夫獨處他鄉，不欺暗室，當魁多士，以彰善報。」次年蜀闈第一。●徽州程孝廉，濱溪而居，溪上木橋甚窄，有一女子探親過此，失足落水，孝廉遣人救之，令妻爲之烘衣，日暮不能歸，又令妻伴宿。次日送歸母家，女之舅姑聞之不悅，曰：「媳未過門，宿於人家，非完女矣。」令媒約退婚。孝廉聞之，親往力諭，乃得成婚。不一年而夫卒，有遺腹一子，嗣後孀婦教之讀書，燈下常流涕，曰：「汝若成名，無忘程孝廉之恩。」其子少年登科，丙辰入會場，每成一藝，必朗誦，拍案得意，後忽放聲大哭，適孝廉與之隔號，亟問其故。少年曰：「七篇皆極得意，不意燈煤焚卷，勢必貼出，是以哭也。」程曰：「可惜佳文，置於無用，若肯與我謄寫，得中當圖厚報。」少年卽以文與程，果中進士。出榜後，少年詣程寓索報，程置酒與飲，少年因問程君有何陰德，而以我文

成名。程自反平生，無他陰德。少年固請不已。程良久。述前曾救一女子事。少年俯地而拜曰：先生是我母之大恩人也。敢望報乎。因以母燈前語泣告之。事以師禮。世爲婚媾。●徐昂，揚州人。試春闈。京中有王相士，多奇中。徐往質之。王曰：君相之嗣，奈何。及登第，爲西安守郡。途聞納一姬，頗妍麗。徐訊其姓氏，答曰：予父某，作某官，喪於某年，向以饑歲，爲強暴掠售於此。徐深憫之，卽焚券，不令爲妾。及之任，具奩貲，擇善士嫁之。秩滿如京，王見之，駭曰：君相異矣。子星滿容，詎非陰德所致乎。未幾，徐庶妾一再歲而育五子。●姚三非，本姓卞，博學善詩文，館於懷氏。有女常窺之，卞岸然不顧。一日，晒履於庭，女作書納其中，卞得之，卽託故辭歸。袁怡杏作詩讚之，有一點貞心堅匪石。春風桃李莫相猜之句，卞答書力辯其無此事。怡杏緘其書而題曰：德至厚矣。子孫必昌。後其子謙，曾孫錫，皆成進士。●林增志，温州人，奉佛持戒。一日夢觀天榜，見己名在第十，下書不殺不淫之報六字。戊辰果中第十名。●何澄，以醫著名。同郡孫子久病不愈，邀澄治之。其妻密語澄曰：良人病久，典賣殆盡，願以我身酬藥資。澄正色卻曰：娘子胡爲及此。但安心勿憂，當爲療治，慎勿以此污我。且自污也。其妻慚感而退。是夕夢一神，引至公署。主者曰：汝行醫有功，且不於急難中亂人婦女，奉上帝勅，賜汝一官。

錢五萬。未幾，東宮得疾，詔澄一服而愈。賜官錢，悉如夢。●揚州高尙書父，販貨京口，客寓中。時聞安息香撲鼻。一日，忽見壁隙中伸進一枝，公從隙窺之，見少女獨坐。次日，公訪之，主人歸其女也。問何不字人，答曰：擇壻難耳。數日，公訪得一壻，謂主人曰：吾見高鄰某郎甚佳，欲爲作伐，何如？曰：吾意亦屬之，但其家貧。公曰：不妨，吾當借貲與之，卽爲說合。贈數十金以完其美。公歸，夢神語曰：汝本無子，今賜汝一子，可命名銓。踰年果生一子，後登進士，仕至尙書。

●松江諸生沈鸞，中年尙艱子嗣，家貧就館塾。一夕歸家，遇雨，門已關，聞室中有處女聲，詢之，乃鄰女也。以夫人寂處來作伴。沈遂囑勿啟門，冒雨去。宿道院。是夜夢上帝以兩色絲授之，覺時方子夜，見殿內光輝四映，五彩眩目，蓋兩散而月華也。嗣連舉二子，長文系，次可紹，相繼登第。●清德清蔡啟傳，初應鄉薦，時尙無子，夫人私蓄三十金，爲置一妾，妾至，垂泣不止。公問其故，曰：夫以負營債至此，公乘夜往其夫家，語曰：吾爲爾了此事，我今不可歸，歸則心跡不白，遂宿其家，候營卒來，詳告以故。云：汝繳券，我卽付金。公乃命轎舁婦還其夫，以三十金爲贈。後夫人卽生子。康熙庚戌，公及第。●明謝文正公遷少館，毘陵某家有女，乘父母出，遂奔公。公識之，曰：女子未嫁而失身於人，終身之玷也。將使父母夫族皆無顏面，厲色拒

之女慚愧而退。明日卽辭館去。後中成化乙未狀元。至相位。子丕官侍郎。●費樞蜀人也。會試至京。日晡時。一婦人前訴曰。某販繪人女。嫁後夫死。貧無以歸。願得相依。費曰。吾不欲犯非禮。當訪汝父來迎。徧訪得其父。語以女狀。父泣謝。卽取女回。是年費登第。官太守。●鎮江靳翁。五十無子。訓蒙於金壇。其鄰女頗有姿色。夫人鬻釵釧買作妾。翁歸。夫人置酒於房。告翁曰。吾老不能生育。此女頗良。或可延靳門之嗣。翁俛首面赤。夫人謂已在而公報也。遂出而反扃其戶。公卽踰牕而出。告夫人曰。汝意良厚。但此女幼時。吾常提抱之。恆願其嫁而得所。吾老矣。又多病。不可以辱。遂反其女。次年夫人生文僖公。十七發解。次年登第。後爲賢宰。●松江曹生。應試。寓中有婦來就。曹驚。趨往他寓借宿。行至中途。見燈火喝道。來入古廟中。擊鼓升堂。曹伏廟前。聞殿上唱新科榜名。至第六。吏稟曰。某近有短行。上帝削去。應何人補。神曰。松江曹某。不淫寓婦。正氣可嘉。卽以補之。曹且驚且喜。果中第六。●明浙有指揮使。建師。謝子。師病。子取被爲師發汗。誤捲母鞋。墮師牀下。師徒皆不知。指揮見而疑之。入問。妻不服。遂乃遣婢。詭以妻命邀師。而已持刀伺其後。俟其門啓。卽殺之。師聞扣門。問何事。婢曰。妻與相招。師怒叱其婢。不肯開門。指揮復強其妻親往。師復固拒之。曰。某蒙東翁相延。豈以

其冥墮行哉。請速回門終不啓。指揮怒頓平。明日師卽辭館。指揮謝曰。先生真君子也。始述其事謝罪。師是年登第。居顯爵。●信州林茂先者。才學過人。旣與鄉薦。家極貧。閉門讀書。鄰羅舊婦厭其夫不學。私慕茂先才名。夜奔之。茂先呵之曰。男女有別。禮法不容。天地鬼神羅網森布。何可以污我。婦慚而退。茂先次年登第。三子成進士。●清陝西袁公。以闖賊亂。父子失散。流寓江南。欲娶妾生子。適買一婦。至袁宅。背燈而哭。袁詰之。婦曰。無他故。止以家中貧。夫欲求死。故賣身以活之。妾念平日夫婦情篤。故不禁傷痛耳。公惻然。背坐達旦。除身價外。復贈百金。同婦送其夫。令之貿易。夫婦泣哭而去。後欲覓一閨女。送與袁公生子。久而未得。偶至揚州。遇人領一俊童欲賣。因私計我未得女子。先買此童伏事袁公。有何不可。遂買之。渡江送袁。袁諦視之。則其所失子也。報應其神如此。●明雲間陸文定公樹聲。辛丑北上。時郡守王公華。夢見城隍庭下。衆保樹聲爲善士。因召其外父李某。問其平日作何善事。對曰。他不及知。惟於邪色不苟而已。後中會元。其子彥章。己丑進士。●唐臯少時讀書燈下。有女調之。將紙窗搯破。公補訖。題云。搯破紙窗容易補。損人陰隲最難修。後一僧過其門。見狀。元醜。左右懸二燈。書所題二語。異而問之。後果大魁天下。●明江陰張畏巖。夢至一高房。得

試錄一冊。中多缺行。問傍人曰。此今科試錄。問何多缺名。曰。科第三年一考較。須積德無咎者。方有名。如前所缺。皆係舊該中式。因新有薄行而去之者也。指後一行云。汝平生從無淫業。或當補此。宜自愛。是科果中一百五名。●明寧波孫生。家貧訓蒙。終歲不過數金。後失館。身寄塘西張氏抄寫。其家一婢。更餘來奔。公峻拒之。婢與同齋西席得合而去。端午。西席解館。疽發不愈。公代其任。後遇其叔於江口。叔曰。我因兒病。禱於城隍。夜夢城隍坐殿上。呼吏將饑籍所改者。唱名對冊。十餘人外。卽唱姪名。我潛問吏。孫某緣何改去。吏曰。此人四十六歲。應出外餓死。因今年四月十八夜。拒某氏淫奔。延壽二紀。改入祿籍。我深爲姪賀也。後負笈者日多。每歲修儀百餘金。迄公四十六歲。正萬曆三十六年。米價涌貴。死者頗衆。而公裕如。公後分析其子。家已巨富。年古稀。無疾而終。●陶文僖公大臨。年十七。美姿容。赴鄉試。寓有鄰女來奔。三至三卻。遂徙他寓。寓主夜夢神語曰。明日有秀士來。乃鼎甲也。因其立志端方。能不爲奔女亂。上帝特簡。寓主以夢告陶。陶益自砥勵。後中榜眼。官至大宗伯。●時邦美之父。鄭州牙將也。年六十無子。押綱至成都。妻令置妾而歸。得一女甚美。時窺見其用白布總髮。問之。泣曰。父本都下人。爲州掾卒。扶櫬至此。不能歸。賣妾以辦喪耳。邦美父惻然。攜

金助其母。還其女。又爲幹理歸計。及歸。告妻以故。妻曰。濟人危急。爲德甚大。當更爲君圖之。未幾妻孕。一夕夢紫金人端坐中堂。且生邦美。中會元。官至吏部尙書。●明萬曆戊戌狀元。韓秉忠之父。作邑掾。有襲蔭指揮繫冤獄。趙力出之。指揮感媿無報。請以女奉箕帚。趙搖手曰。此名家女。使不得強之。又搖手曰。使不得。畢竟不從。後其子上公車。途有拊其輿者曰。使不得的中狀元。如是者再。及第歸。語父。父太息曰。此二十年前事。吾未嘗告人。何神明之告爾也。●呂公宮。常於某氏館中夜讀。有鄰室少嫗。忽乘月而至。公峻拒之。次日復令侍婢持雙玉魚來贈。公碎其玉。婢慚而退。後位至宮保。未嘗語人。偶因課子及之。終不洩其姓氏。●宋黃靖國。爲儀州判官。一夕被攝至冥。冥官曰。儀州有一美事。卿知之乎。命吏取簿示之。乃醫士聶從志。某年月日。在華亭某宅行醫。其妻某氏奔之。從志力拒。上帝勅從志延壽二紀。子孫兩世登科。靖國旣還。述與從志。從志曰。此事并未嘗與妻子言。不意已書陰籍。其後從志果壽考。子孫皆登科。●明茅鹿門。弱冠遊學餘姚。寓邑廟前錢家。有美婢。慕茅丰姿。一夕。至書室呼貓。鹿門曰。汝何獨自來呼貓。婢笑曰。我非呼小貓。迺喜大茅耳。鹿門正色曰。父命我遠出讀書。若非禮犯汝。他日何以見父。又何顏見若主。婢慚而退。後登嘉靖戊戌榜。官副

使壽九十。●杭州北新關吏顧某，奉差往江南，夜泊蘇州河邊，見一少婦投水，止而問之，則曰：某夫因欠糧繫獄，命在旦夕，不忍見夫先死，故自盡耳。顧解囊中五十金付之，婦謝而去。歸舟，又經其地，向坐酒肆，適對門，卽前婦之家也。婦告其夫，邀歸置酒款之。夫謂婦曰：活命之恩，貧無以報，汝其伴宿以酬之。因留顧宿，夜半，婦就顧寢，顧毅然拒之，披衣逃歸舟中。時杭城失火，延燒數十家，衆見火光，中有金甲神，手執紅旗招展，圍繞一宅，火至輒回，火止視之，乃顧某家也。咸以爲陰德所致。●明羅文毅公倫，赴會試，舟次蘇州，夜夢范文正公來訪，曰：來年狀元屬子矣。倫謙退不敢當。范公曰：子某年某樓之事，誠動太清，以此報子耳。倫因憶昔年曾拒奔女於此樓，夢當不妄。及殿試，果第一。●明雲間莫文通，素樂善，居郡城二里，溼，世爲農家。一日持二十金，至鄉買稻種，泊黃浦，有二人縛一少女，欲沈浦中，莫問之，對曰：此我主人女也，主人察其與人有私，故令投之急流耳。莫曰：小女子何知，且非目擊之事，或有不真者，幸爲釋之，請以二十金爲酬。女得脫，叩首莫前，願執箕帚。莫曰：我豈愛爾姿容哉。憐爾芳年死於曖昧耳，今已昏黑，我舟小難容，汝登岸，亟望有燈火處投入可耳。是夕歸舍，夢神語曰：汝救人命，陰德深重，天報汝以賢子孫。後子勝，以明經始通仕籍，孫昊，鄉薦第。

二。吳子愚亦舉人。愚子如忠亦鄉薦。第二登嘉靖戊戌進士。仕至方伯。其女逃去。一文學收之。生六子。一子卽與愚同年。何三畏曾作善人傳以紀其事。●杭學庠生柳某。因探親遇雨。投宿荒園內。先有一少婦躲雨。生竟夕無異志。端坐簷外。至曉而去。其婦乃庠生王某妻也。婦感生德。以語其夫。夫反疑而出之。後生鄉試。其文已置廢卷。頃忽仍在桌上。考官驚異。細閱其文。了無佳意。復廢之。後將薦卷呈堂。而生卷復在內。因想此生必有陰德。遂一併呈薦。竟中七十一名。而王生適與同房。晉謁時。王生在座。師言及生中之由。且詰其故。生念別無他事。因舉避雨事對。王生感歎。歸迎其妻完聚。且以其妹爲柳續絃。●明太倉州吏顧佐。知賣餅江氏之冤。爲訴之官。得釋。江攜其女至佐家。曰無以爲報。願以此女爲妾。佐固卻之。其後佐吏滿。辦事侍郎衙門。一日至私寓候之。其夫人見之曰。君非太倉顧提控乎。識我否。佐愕然。夫人曰。我乃賣餅女也。賣之商。商以女畜之。嫁充相公副室。尋繼正室。每恨無由報德。當爲相公言之。侍郎疏上其事。孝宗嘉歎。擢爲吏部主事。●清順治己亥。崑山徐殿元立齋。得第之初。有人禱於城隍廟。因止宿焉。中夜見神赫奕升座。喚其人謂曰。汝知徐氏中元之故乎。徐氏累代不淫。久有積行。上格天心。今日鼎甲之發。特其肇端耳。功名雖祕。果報昭昭。

語汝悉知。世之昧然於萬惡之首者，可以悟矣。言畢，卽呵道去。其人謹誌而廣傳之。後健庵庚戌科，彥和癸丑科，同胞三鼎甲。子孫聯翩繼起。●明錢塘陸左城，立身孝友，博物洽聞，善行不可枚舉，而其隱德，尤人所難。嘗寓一友別業，夜有美婦暱就之，城峻拒不納，婦慚悔而退。次日託故避去，人莫知之也。城雖霧豹未彰，而子若孫皆以孝廉明經著聲鄉國。曾孫宗楷，鄉科發解，聯捷南宮。芝蘭奕奕，科第之榮，正未有艾。石門吳青壇侍御，城門下士也。曾聞其事而述之，現載感應篇圖說。金壇王畧句音爲之記。●明冒起宗，自幼虔誦感應篇，戊午入闈，昏迷如夢，覺神助成篇，得領鄉薦。會試下第歸，發願將感應篇增註，因念好色損德尤甚，故於見他色美一條，備列報應。而佐之寫者，南昌羅憲嶽也。辛酉，羅君卽入泮，迄戊辰新正，羅夢仙流三人，一老翁蒼顏黃服，二少年披紫衣，左右侍。老翁出一冊，左顧曰：爾讀之。左立者朗誦良久，羅竊聽之，則冒君所註見他色美二句全註也。讀畢，老翁曰：該中旋顧右立者曰：爾咏一詩。卽咏曰：貪將折桂廣寒宮，須信三千色是空。看破世間迷眼相，榜花一到滿城紅。羅醒，作書詳述夢中事，寄起宗子，曰：尊公應捷南宮矣。但榜花二字難解。比榜發，冒果高捷。後冒於陳宗九齋頭，見類書中有榜花二字，註云：唐禮部放榜，姓僻者號榜花，而冒姓實

應之。

禍淫案

李登年十八爲解元。後五十不第。詣葉靖法師問故。師以叩文昌帝君。帝君命吏持籍示曰。李登生時。上帝賜玉印。十八發解。十九作狀元。五十二位右相。緣得舉後。私窺鄰女。事雖不諧。而繫其父於獄。以此遲十年。降二甲。繼又侵其兄屋基。至形於訟。又遲十年。降三甲。後又於長安邸中。淫一良家婦。又遲十年。今又盜鄰女。爲惡不悛。祿籍削盡。死期將至矣。師歸以告。登遂愧恨而死。

○李登所謂梏之反覆者也。使其早生悔悟。修德贖愆。則狀元宰相。可以完璧歸趙。卽不然。一之爲甚。後業不作。則科甲顯榮。猶可得半而居。乃舉天地之所栽培。祖宗之所積累。而爲一人戕削殆盡。辜負無窮矣。且邪淫之業。視科甲萬不及一。乃以終身富貴。僅易片刻歡娛。不亦愚甚。噫。狀元而爲宰相。數百年中。僅見一二。而因此一孽。蕩然無遺。況他人星命。萬分不及李登。而造孽同之。吾恐司祿神。未必僅降甲以示罰。而猶展期以待其改也。危乎危乎。今之才高學廣。而竟窮困不遇。以老者。宜自返平生。曾有此種罪孽否。

●宦裔徐生。年少有才名。窺鄰女美。誘妻賂使刺繡。使頻往來。一日生匿

榻後妻佯出視庖。生強姦之事。覺。女父母逼令自盡。生後每入試。輒見女披血衣而來。不得第。後爲亂兵所殺。●張明三。隨父官瓊崖。通鄰指揮二女。潛攜渡海。女父追急。明三計窮。推二女死於水。後十年。明三患腰疾。迎孫醫治之。小愈。是夕。孫夢二女曳孫入水。曰。妾本瓊人。來與張索命。汝何阻吾報乎。孫驚覺。以語明三。明三拊膺歎曰。孽至矣。吾其殆乎。逾月死。●龍舒劉堯舉。買舟就試。舟人有女。劉數調之。無由得聞。至二場。出院甚早。適舟人入市貿易。遂與女通。是夕。劉父母夢神告曰。郎君應得首薦。因所爲不義。天榜除名矣。及發榜。主司果已擬元。因違式見黜。劉大悔恨。後竟終身不第。●常熟有錢外郎者。家居武斷。里中有婦。色美而家貧。錢遂貸銀與其夫。令販布於臨清。因與婦通。一日。其夫出門。以潮落不能去。復歸。見錢正擁婦歡飲。夫慚且怒。旋回舟中。錢陰與婦謀。夜遣人詐爲盜殺之。族人知而鳴於官。已伏罪矣。錢又揮金越訴。得以倖免。方出郭門。忽雷雨驟作。兩人俱擊死。●淫其婦而殺其夫。天理難容。冤魂莫解。故人雖巧於謀。爲天更神於報。應試觀此等人。安然不報者。百不得一。亦何異舉刃自殺也哉。●明陸仲錫。生有異才。年十七。從師邱某居京。對門一女甚美。二人屢窺心動。師曰。都城隍最靈。汝試往禱。或當有合。遂禱之。是夜。夢與師俱爲城

陸所迫。大加訶責。命查祿位。及檢籍。陸某下註甲戌狀元。邱某下無所有。神曰。陸某當奏聞上帝。盡削其籍。邱某抽腸。夢方醒。館童敲門。報邱先生絞腸痧死矣。後仲錫竟終身貧賤云。

● 請宿松令朱維高。已酉入江南內簾。取中一卷。夜夢一人告曰。此人有隱惡。不可中。因手書一淫字示朱。詢其詳。不答。次日朱忘前夢。以此卷呈。主試大加賞異。忽以筆抹其篇中險阻二字。朱稟云。中卷中如此字類不少。似不應抹。主試亦悔之。命朱洗去。及洗而墨迹潰透數層。忽憶前夢。遂擯之。然朱終愛其文。特存其稿。但不知姓名耳。朱公本房吳履聲云。● 張寶知成都。華陽李尉妻美。寶欲私之。而尉適以贓敗。寶因劾揭。竄李嶺外。死於路。寶賂尉母。娶之。甚歡。無何婦疾。見尉在傍而死。寶亦得病。夢婦告曰。尉已訴於上帝。且夕取公。宜深居避焉。寶覺而誌之。一日暮坐。遙見堂下有紅袖相招。意謂尉妻。急趨赴。遇尉持毆。口鼻出血而死。● 清鳳陽庠生汪某。家有小池植荷。從未得花。康熙己酉。將往錄遺。見池中忽放一並蒂蓮。父母喜甚。晚閒。生以酒調戲其婢。婦弗阻。遂私焉。晨起視花。則已折矣。父母恨甚。生夢謁文昌。見己名登天榜。帝君忽勾去。涕泣拜禱。三度麾下。心知不祥。怏怏就道。時簡文宗錄取甚公。鳳陽府學遺才。舊額三名。赴試僅有三人。而生獨黜。三次大收。卒不錄。垂涕而歸。●

明玉山邑庠生王某。乘母凶納婦。約以七盡成禮。生寢柩傍。婦宿於房。夜聞叩門聲。婢以郎至。稟婦放入。遂同寢。五鼓遁去。曰：恐外人知。罪吾不孝也。越數日。問及嫁贖。婦曰：准衣銀八十兩。及金簪珥。皆在小箱內。五鼓遂攜箱而去。不復來。迨七盡。生置酒成婚。相與告語。婦方知爲賊所騙。頓足痛哭。誓不復生。歸告父母。遂縊死。會葬。生引棺至墓。忽雷電交作。攝一人跪棺前。則生之堂兄也。手捧金珥及銀。跪而擊死。屍隨破爛。一邑皆驚。此正德九年事也。●清順治閒。嘉興錢某。未第時。館於鄉民某家。有女年十七。適清明拜掃。舉家皆往。止留此女看家。錢遂私焉。後女腹漸大。父母詰之。女以實告。鄉民以錢尙未娶。欲將女贅之。以掩其醜。因詣錢備言。所以錢故作色曰：汝女不肖。將欲污人耶。鄉民忿。歸詈其女。女遂自縊。錢後頻夢此女抱子立於前。登第後。投江寧司理。時以鎮江之變。將從逆諸人。發錢會勘。而錢以受賊議絞。命下之日。復夢此女以紅巾拽其頸。次日卽正法。●山東某生。臨場之夕。其僕忽死。誓置一室。及出場而僕已甦。曰：昨我隨入貢院。聞家主已填中第幾名。且見中者皆有紅旗。家主亦有生大喜。僕因求家主中後。爲之娶妻。生曰：卽娶對門之女何如。僕謙讓不敢。生曰：吾中後。何懼其不送納乎。第二場。僕又死。甦而有怒色。曰：主不中矣。驚叩其故。曰：見官府點

至家主名。忽云某尙未中。已萌造惡之端。令吏改填趙某。家主號前。已不見紅旗。生疑信相半。榜發第幾名。果趙某也。房師將原卷送上。七篇圈滿。不意三場卷。爲燈煤燒去半頁。不可呈堂。因抽落卷補之。生懊恨不已。萊陽宋荔裳先生口述。與生同里。故諱其名。●明宜與有染坊。孀婦極美。木商見而悅之。誘餌百端。終不能犯。因而造謀。夜擲木數根於婦家。明日以盜告官。又賄賂上下。極其窘辱。以冀其從。婦家虔祀趙玄壇。乃哭訴之。夜夢神曰。已命黑虎矣。不數日。商入山販木。叢柯中突出黑虎。嚙商頭而去。●清嘉善庠生支某。康熙己酉秋鄉試歸。謂友顧某曰。吾神魂恍惚。似有崇憑。欲依某僧以懺宿業。顧曰可。乃偕僧往視。支忽發狂。曰。吾含怨三世。今始得汝。僧問有何讐恨。曰。吾前生是其屬將。伊爲主將。乃係勳戚。姓姚。瞞我妻少艾。著吾領兵出征。陷於死地。圖佔我妻。妻自刎。一家骨肉星散。他後死於忠義。我未得報。再世爲高僧。又不得報。三世爲宰相。有政績。福祿神護之。仍不得報。今世該有科名。候三十年。近因渠又有淫業。削去文昌籍。纔得下手。言時恨怒不已。顧曰。怨宜解。不宜結。曰。我恨難釋。不相饒也。支竟顛踣而死。●貴州某生。屢試輒困。乞張真人伏章查天榜。神批曰。此人分當科名。以盜竊故除。起語生。生曰無之。遂申牒自辯。神復批曰。雖無其事。實有其心。

生悔恨莫及。蓋少時見嬌美，偶動一念故也。●嚴武少與一軍使鄰，窺其女美，百計誘之，與俱遁。軍使詣闕進狀，詔出收捕。武懼罪，縊死。此女以滅跡，及在蜀得病，見女子來索命，曰：妾雖失行，然無負於君，乃至見殺，真忍人也。妾已訴於上帝，期在明日。黎明果卒。●江寧差役劉某，有一犯問罪收禁，須十餘金，可贖罪放歸。犯因洩劉到家，賣女以贖罪。劉卽往，與其妻商議，妻頗有姿色，劉欲姦之，妻以夫之性命，賴其扶持，勉從之。隨賣女得二十金，盡付爲贖罪使費。劉持金自用，不爲交納。其妻以銀已交官，夫可計日歸也。候數日無音耗，託一族人往探，因言其故。犯一慟而死。旬日，劉差寒熱交攻，自言某人在東獄告我，卽刻要審。伏席哀號，自云該死。隨云：以我慣說謊，要將鐵鉤鉤我舌頭，須臾舌伸出數寸，一嚼粉碎，血肉淋漓而死。●宿松楊某，有名庠中，奉關帝極其誠敬。夜夢關帝賜以方印，自擬必中。後於樓下淫一良家女，場後歸家，復夢關帝向彼索印。楊云：印授我矣。又何索焉。帝云：不止索印，兼索汝命。某月某樓之事，汝安之乎。不一月，父子俱死。●明正德間，四明符秀才死後，託夢於子云：生前犯淫律，明日託生作南城謝五郎家狗矣。亟行善事，爲我懺悔。言訖，一鬼牽其項，一卒以白皮蒙其首，悲啼躑躅而去。子驚醒，明日謝氏果生狗，身細白，易之歸家，爲廣作善事。五

六年後，狗遂不食而死。又月餘，家之小豎忽踞座大言，如秀才狀。召家人謂曰：我實未嘗犯。因十八歲行過嫂房，嫂方洗妝，指環墮地，令我拾取。我因此動情，後又時時從我笑語。幾至破義，嫂竟病死。我覺神思憤亂，次年亦死。死後有鬼縛至一官府庭下，兩手据地，已成狗形。今因汝行善有功，得懺前孽，將往山東趙醫士家爲第五子。到家一別，言畢，小豎蹶地而醒。●雲間呂某，世家子也。縱情淫慾，其女婢家人恆多污壞成疾者。後子女死喪殆盡，以官事破家，屢受官刑，中年備極困苦，寒無衣，饑無食，屋無苦蓋，疾病無看視者。死之日，棺衾無措，蛆蟲徧體，見者無不慘然。●清康熙癸酉科，松江一廩生，進頭場接卷，忽見一鬼隨之入號，驚泣終夜，合號爲之不安。及次晚，三稿已脫，鬼趨而執其項，因疾呼鄰號生救之，涕泣謂曰：某年之楚，悅一女子，給以爲妻，女子悅，遂通焉，且贈某金，攜至家，內子不容而死。今彼既來，某不可復生矣。鄰號生好言慰之，有頃，聞生在號中乞命，久之，聲息寂然，乃呼號軍燭之。見此生以繫筆紅繩，自繫其頸，已氣絕而逝矣。●湖南陵丹桂籍曰：是私一女子，必使之入場而死，又必使自言其故而死，又必使合場士子皆知其故而死，上天顯示淫報，儆戒至深切矣。●明荆溪二人相善，一豐一窶，窶子妻美，豐子設謀，謂有富家可投生計，具舟

并載其妻以行。將抵山，謂曰：留汝妻守舟，吾與汝先往訪之。引至林中，出腰斧斫死，佯哭下山。謂友婦曰：汝夫死於虎矣。婦大哭，偕上山尋屍，引入深處，擁而求淫。婦不從，忽虎出，嚙豐子去。婦驚走，以爲夫落虎口矣。悲恨無聊，俄見一人遠哭而來，至則其夫也。各道所以，轉悲爲喜而歸。●餘杭張某，商販金陵，寓旅店，有婦稱鄰居，與張通焉。久之，張察鄰居無是婦，疑而詰之，婦曰：正有所託。妾非人也，有楊樞者，非君里人乎？曰：然。婦頓足嚙齒曰：此天下負心人也。妾乃娼婦，少與楊歡，曲意事妾，無所不至，爲誓盟迎歸，生死相保。妾以篋笥歸之，堅心守盟，久無音耗，聞已別娶矣。以是齎恨而死。此店卽妾故居，欲附君歸舟，察楊新婦若何。張如語，既至別張，適楊宅，楊以誕辰，張樂讌客，忽暴死，所娶亦病劇幾死。張聞大驚。●張安國，有文學而無行檢，淫一鄰女，致女死於非命。後應試，主試奇其文，欲取作元，忽聞空中叱曰：豈有淫人害人之人，作榜首者耶？主試忽仆地，及甦，起視其卷，已裂爲粉碎矣。放榜後，主試呼安國告其故，安國慚愧而卒。●建昌羅某，家貧不能娶妻，其母遂改嫁江姓，得銀娶章氏，羅以母故，不忍與婦共枕席。章詢知，脫簪珥衣服，令夫持以取母，夫喜，奔告母，因天晚留宿，不意江前妻子江實，已竊聽之，夜託羅名叩門入內，揀取諸物，且求歡，章不識其詐也，遂攜

所有而去。及天明，夫回，章方知受騙，愧恨縊死。夫具棺殮，昇至郊外，忽雷電交馳，震死一人，手捧簪珥衣服，跪棺前，背書奸賊江實四字。棺木碎裂，章氏立道傍，見夫問其事，相與大慟，扶歸。繼父江潮亦感泣，攜羅夫婦與之同居。●明晉江許兆馨，戊午舉人，往詣本房座師，偶遇尼庵，悅一少尼，遂以勢脅之，強污焉。次日，忽自嚙舌爲兩斷而死。●鉛山人某，悅鄰家婦，美挑之不從，值其夫病，天大雷雨，乃著兩翼花衣，躍入鄰家，奮鐵椎擊殺之，仍躍出，人皆以爲雷擊也。後遣媒求娶，婦因貧改適，伉儷甚篤。一日，婦揀箱見衣，怪其異製，夫因笑而言其故，婦佯爲言笑，俟出，即抱衣赴官，官論絞罪。絞之日，雷大震，身首異處。若肢裂者。●江寧庠生郭亨，已卯入場，未放榜時，其友楊生謂曰：我近爲陰府判官，知君該中五十七名，汝家一婢，爲汝收用，受氣不得其死，屢來赴告，以此除君名矣。郭初聞之不信，及領卷出來，本房已入薦列，乃大悔恨焉。郭生一生忠厚，只因此事不慎，潦倒終身。●按功過格，留婢作妾，爲三十過，特以理而言也。若揣情酌勢，則且有無窮之過存焉。蓋男女之配，雖貧賤而各得所願，強抑爲妾，已違其本願，而更有最難堪者，常有以少艾而事老夫，以嬌柔而遭悍妬，齋恨銜怨，鬱鬱求死，遭此毒者，良可憫也。要其所自，則以一人之不能制慾而然。至妻妾

之間。詆訾相爭。中葺之事。醜穢莫掩。患非一端。人非萬不得已。慎毋以此造無窮之孽也。

● 滁陽王勤政。與鄰婦通奸。有偕奔之約。婦因殺其夫。政聞大駭。卽獨身逃至江山縣。相距七十里。以爲禍可脫矣。餓入飯店。店主具三人食。政問故。店主曰。此披髮隨汝者非人乎。政驚。知怨鬼相隨。卽到官自首。男女俱伏法。

● 豫章有一乳雙生者。相貌聲音如一。自襁褓以至三十。相徵得失皆同。三十一歲。兄弟科舉至省。鄰婦媼而麗。挑其兄。兄正色拒之。且以此戒其弟。弟佯諾。竟與婦通。婦初不知其爲弟也。彼此情稔。因與婦約曰。我得中。必娶爾。及放榜。兄入彀。弟下第矣。弟復誑婦曰。俟我發甲後娶汝。且以乏資。斧爲言。婦傾囊付之。春兄登甲。婦朝夕盼望。音問杳然。抑鬱成病。陰以書貽兄。而婦殂矣。兄得書。驚詰弟。弟俯首輸情。次年弟所舉子殤。而兄子固無恙。慟哭不已。雙目頓盲。未幾亦死。其兄享高爵。多子孫。稱全福焉。

● 凡人當禍患之至。不可盡委之於命。當惕然思我生平所作何孽。致有今日。重自刻責。改過自新。庶可挽回神明之譴怒。而轉禍爲福。不然。是亦豫章之弟而已矣。

● 維揚某生。造一淫書。旣成。夢神呵之。醒而自悔。遂止。後因子夭家貧。仍復付梓。未幾目瞽。手生爛瘡。五指拘攣而死。

● 施耐庵作水滸。其中姦盜之事。描寫如畫。子孫啞者三世。

● 清康熙

丙午年。兗州屬縣有鄭生者。美秀能文。悅舅之女。豔而淑。求爲婚。舅弗許。既諾鄰邑蕭氏之聘。以婿病。逾年未嫁。鄭賂女之婢。得其睡鞋香囊。懷以示蕭之內戚。言女與已有私。蓋計蕭知之。必當離婚。婚既離。則破甑無有顧者。然後可求而得之耳。蕭得證。疑信相半。使人詰女之母。女聞謗言。不勝其憤。取利刃一揮。命隨腕絕。父訟之官。邑侯某公察而殺。捕鄭拷訊。盡得其實。備極五刑而死。

唐元稹之姨女。崔鶯鶯者。絕世姿也。稹固求爲婚。崔母欲以妻其姪鄭恆。不遂其請。積憤甚。因作會真記以污之。且代鶯作唱和詩傳世。遂使無瑕白璧。蒙垢千秋。較之鄭生。罪又甚焉。厥後雷火焚屍之報。不亦宜哉。

●江南一書生。文有藻思。但素性好談人閨闈事。已酉入闈。至三場給燭時。忽見卷面上有好談閨闈四字。生急以手擦去。及膳正視之。卷面已擦破矣。後視硃卷。七篇圈滿。擬中魁。因無三場不錄。自是潦倒終身。

●明季吳下有秦生者。力學多才。尤工詩詞樂府。爲人極其輕薄。惟好作謔語。誚世。或見人形貌不堪。識面而一詩立就。聞人作事可笑。入耳而一歌已成。其臆友夤緣入泮。作遊庠詩一百韻賀之。其鄰人帷薄不修。作黃鶯兒十首贈之。繪影寫風。窮工極巧。流播人口。達於遠近。因此屢困老拳。且訟之官府。幾至褫其衣衿。終不改。晚年忽病瘧發狂。自啖其糞。取

刀自剗其舌。家人奪刀鎖之空室中。覓刀不得。乃嚼舌如糜而細吐之。臭聞戶外。後於窗隙窺見庭中有劈柴斧。遂奮勇突窗而出。取斧自斫而死。

○于覺世曰。以秦生之才。何難爲善俗宜民之用。而乃以此爲殺身之具。何異以隨侯之珠彈雀。太阿之劍刈薪也。近有一生。負異才。自擬必中。然好以經書爲謔浪之談。後屢獲薦。皆因後場有訛被黜。此則侮聖言之報也。因世間才士。往往犯此。不知其非。噫。如此讀書。與優人演戲何殊焉。斯文掃地。皆此種讀書人所致。

●李叔卿素廉謹。同僚孫巖嫉之。妄言於衆曰。叔卿空自得名。以吾視之。狗彘也。或問其說。曰。叔卿妻妹。豈得爲人。自是喧傳遠近。叔卿欲明。不便出口。卽不欲明。憤恚難忍。遂鬱悒死。其妹聞知。大爲驚恨。亦縊死。不數日。雷雨暴作。將巖擊死。暴屍叔卿之門。及葬。雷復發其塚。

○此係有心污讒人。固應如此重報。而無心戲謔。亦斷不可。壬子浙闈。有一婦人進號。隨走隨喚云。東陽王二。舉號大駭。以火燭之。遂不見。因挨尋至內。果有一王姓行二者。具以告。且詰其故。其人思之良久。曰。數年前聚族戲談。偶言一村孀守節。以爲難信。其婦聞之。憤而死。得無是乎。因懼。不敢完卷。收拾出號。墜階傷額。扶至寓。翼旦死。可見戲謔之害。凡有關人名節者。斷不可輕出諸口也。

●藍潤玉。弱冠擅才華。

丰姿韶秀。同學皆以金馬玉堂期之。所居鄰某尙書宅。尙書有女。已字而未嫁。才色傾一時。生偶見於升車時。歸而渴想。一日閒步後園。聞隔牆女子聲。梯而窺之。識爲車中人。乃暗於牆下。鑿去半磚。日覘之。積半年。女出閣。生無因再窺。悵甚。乃賦長相思詞。爲一友所見。舉而投諸火。并誠其勿復告人。於德行大有累。生笑其迂。後入闈。夜夢神扶其目。寤而目痛甚。兩瞳如針刺。不能啓睫。因繳白卷出。歸家痛不止。遂雙瞽。及榜發。燬詞友魁列矣。●吳地某公子。欲姦一寡婦。與所契友謀之。友卽授之計。約某日往。屆期。其父夢緋衣神告曰。汝子當登科甲。因壞心術。盡削去。某友本貧賤。復爲人謀不善。應寸斬其腸。父驚覺。卽至書館。果聞此友哀呼腹痛而死。公子漸漸發狂。披髮行市。卒不能救。●浙江皇甫某。乾隆間進士。旣罷官。主講麗澤書院。後惟老夫婦困頓而沒。嘗語人曰。吾爲某邑知縣時。有門生某。有才無行。中鄉榜後。嫌已聘妻貧。適此女病臟。乃指爲有孕。控於吾。乞斷離。吾拘訊此女。不容置辨。女出刀自剖其腹。事遂上聞。某門生抵罪。而吾亦免官。吾止一子。已登賢書。無何白晝覩女來。遂死。今吾夫婦老而無依。行見爲他鄉無祀之鬼。報亦酷矣。

悔過案

壽康寶鑑 悔過案

明洪燾。一日暴卒。恍惚見綠衣人引之至陰府。洪問平生食祿。綠衣人於袖中出大帙示之。已姓名下。其字如蚊。不能盡閱。後註云。合參知政事。以某年月日姦室女某。降祕閣。修撰。轉運副使。洪悚然淚下。曰奈何。綠衣曰。但力行善事可也。俄而前至大溪。綠衣人推墮之。恍然而寤。死已三日。以心暖故未就殮。遂痛自悔過。力行善事。後公以祕撰兩浙漕運召。甚恐。後竟無他。官端明殿學士。享上壽而終。則力行悔過之報矣。 四世人見有犯此。而仍富貴者。遂疑惑應無憑。第焉知非若洪公之合參政。而降祕撰者乎。又焉知非若洪公之力能悔過。而默爲轉移者乎。慎毋不生敬信。甘心若李登之斷送其狀元宰相。猶詭詭以一第爲幸也。 ●清漢陽一諸生。素有才名。屢試不第。一友爲請。亂叩之。亂答以某生應有科名。因少時館於某家。與一婢私通。欲望登第不能也。生悚然驚懼。因輯戒淫功過格。廣探註案。募貲刊施。至康熙丙子科。仍中式。人皆以爲改過之報云。 ●明項希憲。原名德棻。夢已爲癸卯鄉科。以汚兩少婢。被神削去科名。遂誓戒邪淫。力行善事。以贖前愆。後夢至一所。見黃紙第八名爲項姓。中一字模糊。下爲原字。傍一人曰。此汝天榜名次也。因汝近來改行。故復占此。遂易名夢原。壬子鄉試。中順天二十九名。己未會試。中第二名。甚疑夢中名次之爽。及殿

試爲二甲第五名。方悟合鼎甲數之。恰是第八。蓋鄉會榜皆用白紙。惟殿試榜獨黃紙云。

因夢徹悟。而痛自改過。還是有福人氣象。不然。則既已削去矣。焉得復占此科名哉。可知天道禍淫。不加悔罪之人。有志者。無以一失足。而遂謂不可轉移也。●賈仁。五十無

子。夜夢至一府第。題曰生育祠。仁因叩求子嗣。主者取簿示之。謂曰。汝曾姦人妻。欲求子。不可得也。仁哀告曰。小民無知。乞容贖罪。神曰。汝既悔過。更勸十人不淫。方可贖罪。再勸化多人。則有子矣。仁醒。痛自改悔。因廣勸世人。感化甚衆。後舉二子。●辛卯浙闈場前。有一人夢神祇聚會。考校中式諸人。首名爲鍾朗。有一女子愬怨。中坐者曰。是不可中。因訪求補此名者。旁答曰。盍以孺子代之。某人醒。而以夢告鍾。因細詢鍾委曲。知其家有婢懷妊。爲主母不能容。赴水死。鍾常以此不安於心。聞夢驚駭殊甚。是科鍾果不中。余恂中元。所謂孺子者。乃恂之字也。未幾。鍾妻病歿。鍾益懼。由是力行不怠。次科甲午。仍中解元。●華亭張某。少有淫行。後生二子。皆不育。復得瘵疾。經年不愈。偶見丹桂籍案中。淫報彰彰。不勝悔恨。遂在神前立誓。永戒邪淫。復刊陰鷲文廣施。其疾尋愈。數年間。連舉三子。●明田某。丰姿俊雅。里中婦女多奔之。遂避鄰近之南山寺讀書。寺傍亦有來者。田心知其非。而不能忍斷。有一神甚短

小初每見夢寐。繼則白日現相。謂之曰。汝原有大福。合官御史。因花柳多情。削去殆盡。上帝命我監視。若自今改過。仍可不失功名。遂猛省悔改。後果登第。●明崇禎間進士曹穉韜。爲諸生時。與鄰婦私。其夫知而欲殺之。詭語其婦曰。我明日遠出。數日纔歸。婦聞而喜。以爲真也。遽約穉韜往。是日諸友約會課。清晨。友人來拉穉韜。穉韜辭焉。友人知其故。強之到會文所。友謂主會者曰。今日作文。要照大場式。夜宴必盡醉而返。不如約者有罰。并令主會者封鎖門戶。諸生不得擅出入。穉韜大窘。不得已。草草完篇。欲先歸。諸友譁曰。有前約在。歸何急也。及夜飲。穉韜有心事。留量不飲。諸友強之飲。苛罰之。穉韜大醉。諸友送之歸。已不能赴約矣。鄰婦候穉韜久。倚門而望。有無賴子。知婦素行者。見其倚望。必有約不來也。遂挑之。婦亦不拒。其夫潛伏窺見。持斧殺之。并殺其妻。次日穉韜聞其事。遂要諸友爲證。盟諸神明。誓爲善補過。斷不復行邪徑。後數年成進士。當日穉韜之生而死。死而生者。間不容髮。賴良友以獲免。彼無賴子者。見可欲而動。竟忘隱禍之伏。不轉眼而死於斧下。諺云。姦必殺。洵哉。●張寧。晚年無子。禱於家廟曰。寧有何罪孽。致斬先人繼嗣。傍一妾云。不耽誤我輩。卽陰鷲耳。寧悚然醒悟。察不願留者。卽日遣嫁數人。次年卽舉一子。●上海崔書紳。嘗倩人繪春宮十數

幅淫巧絕倫。後患瘡不已。每熱甚。則見美男子美婦人十數輩。皆赤身露體。二鬼使挾之。剖腹抽腸。流血滿地。次及於崔。疼痛呼號。詳語始末。舉室皆聞。崔醒悟。急焚之。病遂愈。●趙巖士少時曾犯色戒。漸至形神衰羸。體如骨立。幾無復有生望。適閱謝漢雲所刊不可錄。不覺汗流浹背。痛改前愆。并請其板。捐貲印送。後精神漸旺。連得六子。●明嘉靖間某生。東鄰一婦甚豔。屢屢流盼。一日乘夫他往。穴牆招生。生亦心動。問從何來。婦哂曰。君讀書人。豈不憶東家牆乎。生取梯而上。忽轉念曰。人可瞞。天不可瞞。遂下。婦又趨於故處。婉挑。生復情動。重梯而上。已騎牆欲過矣。又忖曰。天終不可瞞。急下。扃門而出。次年鄉試北上。典試者進場之夕。秉燭獨坐。忽聞耳畔言曰。狀元乃騎牆人也。及榜後詢及。始悉前事。●明萬曆壬子。武進張璋。同某生應試南京。抵寓之夕。主人夢迎天榜。解元乃某生也。具以告生。生揚揚得意。主人有二女樓居。甫及笄。聞而心動。使婢招生。自樓縋布爲梯。生拉璋俱登。及半。璋忽猛省曰。吾來應試。奈何作此損德事。急墮身下。生竟乘而上。是晚。主人復夢天榜。見解元已易張璋名矣。大駭。具以告生。且詰其近作何事。生面赤無以應。發榜果然。生大慚悔。後竟貧鬱死。

●按張生與騎牆人。皆悔悟於臨時。較之曾犯而後戒者更優。第此時若不猛省。非特失

卻應有功名。且墮入無邊苦海。可畏哉。

●宋黃山谷。好作豔詞。嘗謁圓通秀禪師。秀呵

曰。大丈夫翰墨之妙。甘施於此乎。時秀方戒李伯時畫馬。谷笑曰。無乃復置我於馬腹中耶。秀曰。伯時念想在馬。墮落不過一身。公以豔語動天下人淫心。豈止馬腹中。正恐墜泥犁耳。谷悚然愧謝。自是絕筆。●四川錢大經。丰神秀異。下筆千言。十七歲遊庠。屢困場屋。庚子大比。禱於文帝。夜夢青衣童子。引至帝前。命吏查冊云。錢大經二十歲鄉榜第二。聯捷。大魁天下。官二品。壽七十三歲。緣造淫書三部。削籍。壽亦不永矣。帝諭曰。汝存心忠厚。且孝友無虧。奈造淫書。使男女敗名喪節。若非前生植德宏多。已判入地獄矣。大經遂立重誓。逢人勸戒。遇淫書輒焚燬。後以明經老。年六十二而終。

同善養生

雲閒謝漢雲。幼抱沈疴。因念諸惡業中。惟色易犯。遂取繁陽馮太史所輯不可錄。重訂付梓。以廣其傳。及刊鐫甫成。而病已霍然。後令嗣及諸孫輩。皆名振一時。如星門。霞軒。體三等。相繼獲售。其書香正未有艾也。●徐信善。與楊宏。牕友也。赴試同寓。遇高僧相云。楊當大貴。徐當貧。是夜。楊偶見寓中處女美麗。計以重賂求淫。徐嚴詞力止之。次日。僧復遇徐。大駭曰。一

夕之間。如何便有陰鷲紋起。易賤爲貴。當大顯。復相楊曰。氣色殊不及昨日。固當與徐同顯。爾名次稍後矣。發榜果然。●宋簡州進士王行庵。制行不苟。與表弟沈某爲鄰。沈素好淫。公每勸之。沈不聽。潛使一僕婦誘公。公嚴拒之。嗣又擇一美婢。使固誘公。公亦嚴拒之。沈意將破公之戒而笑之也。一日公與沈外出。遇盜。沈以舟小得脫。公舟爲盜所截。霎時間雷電震驚。盜戰慄而去。公安然反旆。一無所失。沈後出外回家。見其妻與人苟合。欲取器擊之。手忽不能舉。怒目頓足。浩歎一聲而卒。公年五十。患病設醮。道士奏疏。拜伏良久。復云。查公大限。壽止五旬。天曹以公兩次不淫。并能實意勸人。增算三紀。公聞之悚然。後果壽八十六。親見子孫富貴。●此與徐公信善。既能持己以正。又能愛人以德。規之而聽。則人被其澤。卽不聽。而勸化熱腸。已足以格天獲福。人亦何憚而不爲哉。●嘉興府庠某生。性喜隱。惡揚善。遇子弟親友。談及閨門事。輒正色怒戒。因作口孽戒文。垂訓後學。後進棘闈。放榜前一夕。夢其父語曰。汝前生少年進士。因恃才傲物。上帝罰汝屢困場屋。終不發達。前月有一士。應今科聯捷者。爲姦室女除名。文帝奏汝作口孽戒文。勸人陰功甚鉅。請以汝名補之。汝必聯捷。宜益修德以報天神。生驚喜。登第後。謹厚倍常。仕至御史。●席匡。初穎悟。遇一相者曰。子

有縱紋入口。當餓死。應在明年。匡甚憂。一日遇有談人。閩閩事。甚係名節。匡對之勃然作色。談者心愧而止。其事遂隱。逾年竟無恙。後遇相者。怪問曰。子豈有大陰功。何生相頓殊耶。匡後登高位。●宋端宗時。元師攻台。臨海民妻王氏。有令姿。被掠至師中。千夫長殺其舅姑與夫。而欲私之。婦誓死不從。伴曰。能俾我爲舅姑與夫服期月。乃可事君子。千夫長見其不難於死。從所請。仍使俘婦雜守之。師還挈行。過嵯之清風嶺。王氏仰天歎曰。吾今得死所矣。卽嚙指寫詩石上。投崖而死。距今八九十年。石上血猶墳起如新。不爲風雨所剝。一士人作詩非之云。嚙指題詩似可哀。斑斑駁駁上青苔。當初若有詩中意。肯逐將軍馬上來。後其人絕嗣。元楊廉夫亦作詩曰。甲馬馱馱百里程。清風後夜血書成。只應劉阮桃花水。不似巴陵漢水清。後廉夫無子。一夕夢一婦人曰。爾憶王節婦詩乎。雖不能損節婦之名。而毀謗節義。其罪至重。故天絕爾後。廉夫悔悟。更作詩曰。天隨地老妾隨兵。天地無情妾有情。指血嚙開霞嶠赤。苔痕化作雪江清。願隨湘瑟聲中死。不逐胡笳拍裏生。三月子規啼斷血。秋風無淚寫哀銘。後復夢婦人來謝。未幾生一子。●鄭子元。有心疾。昏憤如夢。聞有老僧能治。往叩之。僧曰。此疾由淫欲過度。水火不交。凡溺愛冶容。而作色荒。謂之外感之欲。夜深枕上。思得冶容。

或成夢寐之交。謂之內生之慾。二者糾纏染著。皆耗元精。增疾病。傷性命。必成不治之證。急須先將心內色念。斷除淨盡。再將身體保養。不令走洩。則腎水不至下涸。相火不至上炎。水火既交。自漸愈耳。故曰苦海無邊。回頭是岸。●宋包宏齋年八十八。以樞密拜登。精神強健。實似道意。其必有攝養之術。問包包曰。予有一服丸子藥。乃不傳祕方。似道欣然叩之。包包徐曰。虧吃了五十年獨睡丸。滿座大笑。●蒲得政知杭州。鄉老李覺來謁。年已百歲。色澤光潤。公問攝養之術。曰。某術至簡易。但絕慾早耳。●太倉張翠九十餘。耳目聰明。尙能作畫。人問之。答曰。惟慾心淡。慾事節耳。

發誓持戒

曾周裕嘗集善友。以戒邪淫單式。刊布同社。每人各領一單。分勸十人。謹列鄉貫年庚。各自出名簽押。焚告於文武二帝前。嗣後動念發言。務期戰兢惕厲。不敢少涉邪淫。不幸有犯此者。愧悔一萌。已足消彌天之大過。幸而未犯此者。從今堅制。不致貽白璧之微瑕。彼此相規。始終不易。轉相廣勸。俾世人永斷孽根。咸歸正路。則功茂而福無量矣。●駱季和云。古人云。萬惡淫爲首。百行孝爲先。余嘗推斯二語。以竟厥旨。而知相反適以相成。此其理可得而論。

焉。夫既以淫爲萬惡之首。則可例知不淫之爲百行先資矣。既以孝爲百行之先。則可例知不孝之爲萬惡本源矣。反覆比勘。一言已足。而此更析而二之者。何哉。蓋好淫卽不能全孝。而欲全其孝。必自不淫始。古昔聖人之制婚姻也。申以媒妁。裁以六禮。小之則爲嗣續。主祭明倫輔德之要。大之則爲治國平天下之本。無非欲人始終以全其孝耳。故曰君子之道。造端乎夫婦。世衰道微。聖哲不作。古意盡失。禮等具文。以夫婦爲欲樂之具。年少德業未成。已知少艾之可慕。爲父母者。亦復爲之詭隨。藉以維繫人子之心。由是公然以好色爲人生正當之事。且張大其辭曰。繼血統。綿嗣續。浸假而夫婦之情。彌篤。父母之養。以虧。工於媚內。外父母而墮大不孝。正不必甕牖繩樞之族。而色母諱姑。久已沿爲風尚矣。人情難於遷善。而易於習惡。夫既以視夫婦爲欲樂之具矣。勢必男女異同之見愈深。貪淫愛慕之念日熾。得新厭故。觸處生情。視天下男女。無不可供吾之欲樂者。而邪淫之風以啓。相妒相殺。傷身辱親。萬惡叢興。百行俱廢。不孝之罪。莫斯爲甚。推厥由來。豈非兆於當日夫婦一念淫欲之故乎。故曰二語實相反而適相成也。不知者猶欲以此淫字強分邪正。其可謂深得古人之微旨乎。經曰。一切衆生。皆因淫欲而正性命。欲因愛生。命因欲有。衆生愛命。還依欲本。當知輪

週愛爲根本。又曰。由於欲境。起諸違順。境背愛心。而生憎嫉。造種種業。是故復生地獄餓鬼。此可知淫爲人生大患。初不分邪正也。惟吾人自無始以來。久因愛欲。而得此身。家獄已成。業根難拔。如來憐憫。猶開方便之門。得戒邪淫。許託蓮華之種。戒德香經云。不犯他妻。余之爲此言者。非必以嚴格絕欲主義。強人情所難能。實願同志深知。徒貪閨房欲樂。不顧倫常大義者。已爲悖理。何況馳情外遇。視爲固常。因而推知。雖力戒邪淫。不過完得人乘五戒之一。若復恣情漁獵。必難免三塗惡道之淪。由是感發興起。力圖自振。內端齊家之本。外絕爭逐之心。溯委尋源。奮功修於一旦。泥洹在望。佛般泥洹經云。戒邪淫。十罪頓超。法苑珠林云。得五增禰。入泥洹道。我佛誠言。不吾欺也。爰定誓盟。對神宣發。用資防守。昭格來茲。凡在佛子。諒有同心。聊綴數言。以當嚶引。

誓願文式

須端楷依此書寫對神宣讀焚化以昭誠敬

中華民國 年 月 日 立願戒邪淫弟子

齋戒薰沐。焚香具疏。敬謹宣誓於

座前曰。百善先孝。萬惡首淫。人異禽獸。以其存心。雁集中澤。尙不亂羣。我爲佛子。可不如禽。自今日始。誓戒邪淫。盡我形壽。永不渝心。若有犯者。卽禍其身。尙不蔽過。殃及

子孫玷污大教。罪實非輕。亟以勸來。護法神明。慈悲哀憐。鑒此葵忱。護持默佑。永保生生。

弟子

謹具押

一堅戒力。人之存心。非善卽惡。人之享受。非福卽禍。天道禍淫。不加悔罪之人。誠始迷而終悟。自災去而福來。但懺悔受戒之後。必須戰戰兢兢。臨深履薄。直至啟手啟足之後。而後可告無罪於神明。設受戒之後。又復犯戒。則誓辭在前。神威在後。決定受禍。不可救藥。如傷寒小愈。便食葷腥。前證一發。決無生理。惟願同人。至心歸依。時時對越神明。刻刻常思禍患。昔人云。一之爲甚。其可再乎。况既已發誓。豈同兒戲。

一堅信心。凡受戒諸人。須知人命不齊。如地有肥瘠。而在天雨露。原無二施。栽者培之。傾者覆之。培與覆之權。雖在天。而栽與傾之機。實在我。彼惡人而享非常之福。未必是真福。或借此以重其殃。否則祖德前因甚厚也。善人而受無端之禍。未必是真禍。或借此以玉汝成。否則夙業往愆所致耳。惟願世人。倘遇順境。更加精進。倘遇逆境。益宜勇猛。盡其在我而已。保身立命戒期及天地人忌

題善禍淫之理。言之詳矣。若夫夫婦之際。人所易忽。不知一歲之中。有斷宜齋戒之日。如月

令先雷三日。乃春分前三日奮木鐸以令兆民曰。雷將發聲。有不戒其容止者。生子不備。必有凶災。是也。况入身氣血流行。原與天地節氣相應。倘非時走洩。則氣血不能合度。其傷精損氣。百倍他時。至於神明降鑒之期。而淫污冒瀆。有陰被譴責而不覺者。故世有循謹之人。而陽受疾病夭札之傷。陰遭削祿減年之禍。往往皆由於此。與其追悔而莫挽。何如遵戒以自新。敬錄戒期及天地人忌。冀自愛者。咸遵守焉。

正月 共十八日

初一 天臘 玉帝校世人神氣祿命犯者削祿奪紀 又月朔犯者奪紀每月同 ●初三
萬神都會犯者奪紀 又斗降犯者奪紀每月同 ●初五 五虛忌 ●初六 六耗忌
又每月初六爲雷齋日犯者減壽 ●初七 上會日犯者損壽 ●初八 五殿閻羅天子誕
犯者奪紀 又四天王巡行每月同 ●初九 玉皇上帝誕犯者奪紀 ●十三 楊公忌 ●
十四 三元降犯者減壽 又四天王巡行每月同 ●十五 三元降犯者減壽 又上元
神會犯者奪紀 又月望犯者奪紀每月同 又四天王巡行每月同 ●十六 三元降犯
者減壽 ●十九 長春真人誕 ●廿三 三尸神奏事 又四天王巡行每月同 ●廿五

每月廿五爲月晦日犯者減壽 又天地倉開日犯者損壽子帶疾●廿七 斗降犯者奪紀每月同●廿八 人神在陰犯者得病宜先一日卽戒每月同●廿九 四天王巡行每月同●三十 月晦 司命奏事犯者減壽如月小卽戒廿九每月同 又四天王巡行每月同

二月 共十八日

初一 月朔 又一殿秦廣王誕犯者奪紀●初二 萬神都會犯者奪紀 又福德土地正神誕犯者得禍●初三 斗降 又文昌帝君誕犯者削祿奪紀●初六 雷齋日犯者減壽 又東華帝君誕●初八 釋迦牟尼佛出家三殿宋帝王誕犯者奪紀 又張大帝誕 又四天王巡行●十一 楊公忌●十四 四天王巡行●十五 釋迦牟尼佛般涅槃 月望 太上老君誕犯者削祿奪紀 又四天王巡行●十七 東方杜將軍誕●十八 四殿五官王誕 又至聖先師孔子諱辰犯者削祿奪紀●十九 觀音大士誕犯者奪紀●廿一 普賢菩薩誕●廿三 四天王巡行●廿五 月晦日犯者減壽●廿七 斗降犯者奪紀●廿八 人神在陰犯者得病●廿九 四天王巡行●三十 月晦 司

命奏事犯者減壽如月小卽戒廿九 又四天王巡行

三月 共十七日

初一 月朔 又二殿楚江王誕犯者奪紀●初三 斗降 又玄天上帝誕犯者奪紀●
初六 雷齋日犯者減壽●初八 六殿下城王誕犯者奪紀 又四天王巡行 ●初九
牛鬼神出犯者產惡胎 又楊公忌●十二 中央五道誕●十四 四天王巡行●十
五 月望 昊天上帝誕玄壇誕犯者奪紀 又四天王巡行●十六 準提菩薩誕犯者
奪紀●十八 中嶽大帝誕 又后土娘娘誕 又三茅降●二十 天地倉開日犯者損
壽 又子孫娘娘誕●廿三 四天王巡行●廿五 月晦日犯者減壽●廿七 斗降
又七殿泰山王誕犯者奪紀●廿八 人神在陰犯者得病 又蒼頡至聖先師誕犯者削
祿奪紀 又東嶽大帝誕●廿九 四天王巡行●三十 月晦 司命奏事犯者減壽月
小卽戒廿九 又四天王巡行

四月 共十八日

初一 月朔 又八殿都市王誕犯者奪紀●初三 斗降犯者奪紀●初四 萬神善化

犯者失瘖夭胎 又文殊菩薩誕●初六 雷齋日犯者減壽●初七 南斗北斗西斗同
降犯者減壽 又楊公忌●初八 釋迦牟尼佛誕犯者奪紀 又萬神善化犯者失瘖夭
胎 又善惡童子降犯者血死 又九殿平等王誕 又四天王巡行●十四 純陽祖師
誕犯者減壽 又四天王巡行●十五 月望犯者奪紀 鍾離祖師誕 又四天王巡行
●十六 天地倉開日犯者損壽●十七 十殿轉輪王誕犯者奪紀●十八 天地倉開
日 又紫微大帝誕犯者減壽●二十 眼光聖母誕●廿三 四天王巡行●廿五 月
晦日犯者減壽●廿七 斗降犯者奪紀●廿八 人神在陰犯者得病●廿九 四天王
巡行●三十 月晦 司命奏事犯者減壽如逢月小卽戒廿九 又四天王巡行

五月 共廿二日 按此月宜全戒爲是

初一 月朔 又南極長生大帝誕犯者奪紀●初三 斗降犯者奪紀●初五 地臘
五帝校定生人官爵犯者削祿奪紀 又九毒日犯者夭亡奇禍不測 又楊公忌●初六
九毒日犯者夭亡奇禍不測 又雷齋日●初七 九毒日犯者夭亡奇禍不測●初八
南方五道誕 又四天王巡行●十一 天倉開日犯者損壽 又天下都城隍誕●十

二 炳靈公誕 ● 十三 關聖降神犯者削祿奪紀 ● 十四 四天王巡行 又夜子時爲
天地交泰犯者三年內夫婦俱亡 ● 十五 月望 九毒日犯者夭亡奇禍不測 又四天
王巡行 ● 十六 九毒日 又天地元氣造化萬物之辰犯者三年內夫婦俱亡 ● 十七
九毒日犯者夭亡奇禍不測 ● 十八 張天師誕 ● 廿二 孝娥神誕犯者奪紀 ● 廿三
四天王巡行 ● 廿五 九毒日犯者夭亡奇禍不測 又月晦日 ● 廿六 九毒日犯者夭
亡奇禍不測 ● 廿七 九毒日犯者夭亡奇禍不測 又斗降 ● 廿八 人神在陰犯者得
病 ● 廿九 四天王巡行 ● 三十 月晦 司命奏事犯者減壽如逢月小卽戒廿九 又
四天王巡行

六月 共十七日

初一 月朔犯者奪紀 ● 初三 斗降犯者奪紀 又楊公忌 ● 初四 南瞻部洲轉大法
輪犯者損壽 ● 初六 天倉開日 又雷齋日犯者損壽 ● 初八 四天王巡行 ● 初十
金粟如來誕 ● 十三 井泉龍王誕 ● 十四 四天王巡行 ● 十五 月望犯者奪紀 又
四天王巡行 ● 十九 觀音大士涅槃犯者奪紀 ● 廿三 南方火神誕犯者遭回祿 又

四天王巡行●廿四 雷祖誕 又關帝誕犯者削祿奪紀●廿五 月晦日犯者減壽●
廿七 斗降犯者奪紀●廿八 人神在陰犯者得病●廿九 四天王巡行●三十 月
晦 司命奏事犯者減壽如月小卽戒廿九 又四天王巡行

七月 共廿一日

初一 月朔犯者奪紀 又楊公忌●初三 斗降犯者奪紀●初五 中會日犯者損壽
一作初七●初六 雷齋日犯者減壽●初七 道德臘 五帝校生人善惡 又魁星
誕犯者削祿奪紀●初八 四天王巡行●初十 陰毒日大忌●十二 長真譚真人誕
●十三 大勢至菩薩誕犯者減壽●十四 三元降犯者減壽 又四天王巡行●十五
月望 又三元降 又地官校籍犯者奪紀 又四天王巡行●十六 三元降犯者減
壽●十八 西王母誕犯者奪紀●十九 太歲誕犯者奪紀●廿二 增福財神誕犯者
削祿奪紀●廿三 四天王巡行●廿五 月晦日犯者減壽●廿七 斗降犯者奪紀●
廿八 人神在陰犯者得病●廿九 楊公忌 又四天王巡行●三十 地藏菩薩誕犯
者奪紀 月晦 司命奏事如月小戒廿九 又四天王巡行

八月 共十八日

初一 月朔犯者奪紀 又許真君誕●初三 斗降 又北斗誕犯者削祿奪紀 又司
命竈君誕犯者遭回祿●初五 雷聲大帝誕犯者奪紀●初六 雷齋犯者減壽●初八
四天王巡行●初十 北斗大帝誕●十二 西方五道誕●十四 四天王巡行●十
五 月望 太陰朝元宜焚香守夜犯者暴亡 又四天王巡行●十六 天曹掠刷真君
釋犯者貧夭●十八 天人興福之辰宜齋戒存想吉事●廿三 四天王巡行 又漢桓
侯張顯王誕●廿四 竈君夫人誕●廿五 月晦日犯者減壽●廿七 斗降 又至聖
先師孔子誕犯者削祿奪紀 又楊公忌●廿八 人神在陰犯者得病 又四天會事●
廿九 四天王巡行●三十 月晦 司命奏事犯者減壽如月小卽戒廿九 又諸神考
稷犯者奪算 又四天王巡行

九月 共廿二日

初一 月朔 又南斗誕犯者削祿奪紀 自初一至初九 北斗九星降世犯者奪紀此
九日俱宜齋戒●初三 五瘟神誕●初八 四天王巡行●初九 斗母誕犯者削祿奪

紀 又鄧都大帝誕 又玄天上帝飛昇●初十 斗母降犯者奪紀●十一 宜戒●十三
孟婆尊神誕●十四 四天王巡行●十五 月望犯者奪紀 又四天王巡行●十七
金龍四大王誕犯者遭水厄●十九 日宮月宮會合 又觀世音菩薩誕犯者減壽
●廿三 四天王巡行●廿五 月晦日犯者減壽 又楊公忌●廿七 斗降犯者奪紀
廿八 人神在陰犯者得病●廿九 四天王巡行●三十 藥師琉璃光佛誕犯者得危
疾 月晦 司命奏事犯者減壽如月小卽戒廿九 四天王巡行

十月 共十六日

初一 月朔 民歲臘犯者奪紀 又四天王降犯者一年內死●初三 斗降犯者奪紀
又三茅誕●初五 下會日犯者損壽 又達摩祖師誕●初六 天曹考察犯者奪紀
●初八 佛涅槃日大忌色慾 又四天王巡行●初十 四天王降犯者一年內死●十
一 宜戒●十四 三元降犯者減壽 又四天王巡行●十五 月望 又三元降 又
下元水府校籍犯者奪紀 又四天王巡行●十六 三元降犯者減壽●廿三 楊公忌
又四天王巡行●廿五 月晦日犯者減壽●廿七 斗降犯者奪紀 又北極紫微大

帝降●廿八 人神在陰犯者得病●廿九 四天王巡行●三十 月晦 司命奏事犯者減壽如月小卽戒廿九 又四天王巡行

十一月 共十八日

初一 月朔犯者奪紀●初三 斗降犯者奪紀●初四 至聖先師孔子誕犯者削祿奪紀●初六 西嶽大帝誕●初八 四天王巡行●十一 天倉開日 又太乙救苦天尊誕犯者奪紀●十四 四天王巡行●十五 月望 又四天王巡行 上半夜犯男死下半夜犯女死●十七 阿彌陀佛誕●十九 太陽日宮誕犯者得奇禍●廿一 楊公忌●廿三 張仙誕犯者絕嗣 又四天王巡行●廿五 掠刷大夫降犯者遭大凶 又月晦日●廿六 北方五道誕●廿七 斗降犯者奪紀●廿八 人神在陰犯者得病●廿九 四天王巡行●三十 月晦 司命奏事犯者減壽如月小卽戒廿九 又四天王巡行

十二月 共二十日 按自二十後十日俱宜戒

初一 月朔犯者奪紀●初三 斗降犯者奪紀●初六 天倉開日 又雷齋日犯者減

壽●初七 掠刷大夫降犯者得惡疾●初八 王侯臘犯者奪紀 又釋迦如來成佛之辰 又四天王巡行 初旬內戊日 亦名王侯臘犯者奪紀●十一 太素三元君朝眞●十四 四天王巡行●十五 月望犯者奪紀 又四天王巡行●十六 南嶽大帝誕●十九 楊公忌●二十 天地交道犯者促壽●廿一 天猷上帝誕●廿二 五嶽神降 又四天王巡行●廿四 司命朝天奏人善惡犯者得大禍●廿五 三清玉帝同降 考察善惡犯者得奇禍●廿七 斗降犯者奪紀●廿八 人神在陰犯者得病●廿九 華嚴菩薩誕 又四天王巡行●三十 諸神下降察訪善惡犯者男女俱亡 以上戒期每年通共二百二十五日。閏月照前。皆係每月中之一定者。此外更有二分之二月。春分雷將發聲。犯者生子五官四肢不全。父母有災。宜從驚蟄節禁起。戒過一月。秋分殺氣浸盛。陽氣日衰。宜從白露節禁起。戒過一月。此二節之前三後三共七日。犯之必得危疾。尤宜切戒。●二至之月。夏至陰陽相爭。死生分判之時。宜從芒種節禁起。戒過一月。冬至陰陽相爭。死生分判之時。宜從大雪節禁起。戒過一月。此二節乃陰陽絕續之交。最宜禁忌。至節之前三後三共七日。犯之必得急疾。尤宜切戒。●又冬至半夜子

● 肆犯之。并冬至後庚辛日。及第三戌日。犯之。皆主在一年內亡。● 三元日。犯之。減壽五年。● 四立。四離。四絕日。二社日。犯之。皆減壽五年。又社日受胎者。毛髮皆白。● 三伏日。弦日。晦日。每月三辛日。犯之。皆減壽一年。● 甲子日。庚申日。值年太歲日。及拈香持齋供謝神佛日。犯之。皆減壽一年。● 祖先亡忌日。父母誕日。忌日。犯之。皆減壽一年。● 己身夫婦本命誕日。犯之。皆減壽。● 丙丁日。天地倉開日。犯之。皆得病。● 毀敗日。大月十八日。小月十七日。爲毀敗日。犯之。得病。● 十惡大敗日。甲巳年三月戊戌日。七月癸亥日。十月丙申日。十一月丁亥日。● 乙庚年。四月壬申日。九月乙巳日。● 丙辛年。三月辛巳日。九月庚辰日。十月甲辰日。● 丁壬年。無忌。● 戊癸年。六月己丑日。此皆大不吉之日。宜戒。● 陰錯日。正月庚戌日。二月辛酉日。三月庚申日。四月丁未日。五月丙午日。六月丁巳日。七月甲辰日。八月乙卯日。九月甲寅日。十月癸丑日。十一月壬子日。十二月癸亥日。此陰不足之日。俱宜戒。● 陽錯日。正月甲寅日。二月乙卯日。三月甲辰日。四月丁巳日。五月丙午日。六月丁未日。七月庚申日。八月辛酉日。九月庚戌日。十月癸亥日。十一月壬子日。十二月癸丑日。此陽不足之日。俱宜戒。 ㊦

以上戒期。每年俱宜按照時憲書。逐月查明錄出。夾在此本。遵依禁戒。

酷暑嚴寒。犯之得重疾不救。●烈風雷雨。天地晦冥。日月薄蝕。虹現地動。犯之。產怪物身死。

●白晝。星月之下。燈光之前。犯之。皆滅壽。○以上天忌。切宜禁戒。

廟宇寺觀庵堂之內。犯之。大減祿壽。●井竈圍廁之側。荒園塚墓尸柩之旁。犯之。惡神降胎。

並產怪物身死。○以上地忌。切宜禁戒。

鬱怒。大怒傷肝。犯之必病。●遠行。行房百里者病。百里行房者死。●醉飽。醉飽行房。

五臟反覆。●空腹。犯之傷元神。●病後。犯之變證復發。●胎前。犯之傷胎。故凡有孕。

後。卽宜分牀絕慾。一則恪遵胎訓。一則無墮胎之患。及小兒胎毒胎癩。凶險瘡痘。遊風驚瀾。

牙疳等病。三則所生之兒。男必端嚴方正。女必貞靜幽閒。自然不犯淫佚。●產後。十餘日。

內犯之婦必死。百日內犯之婦必病。●天癸來時。犯之成血淋證。男女俱病。●竹席。竹。

性寒涼。犯之易感寒氣。●薄衾。犯之寒氣入骨。●窗隙有風宜避。夜深就枕宜戒。●交。

合才畢。嬰兒在旁啼哭。勿卽與乳。●交罷勿卽揮扇。及飲冷茶水。以若過受涼。或至卽死。●

一夕勿兩度。●勿服春方邪藥。●勿蓄縮不洩。●凡生病。生瘡。出痘後。非十分復原。萬不可。

犯。犯則多半必死。●凡目疾未愈。或始愈。犯之必瞎。●凡虛癆證。雖養好強健。猶須斷欲一。

年。若以爲復原而犯。多半必死。●凡傷損筋骨。好後猶須戒百七八十日。若未過百日。犯之必死。縱過百日。亦必致成殘廢。●凡過辛苦。過操心。過熱。過憂愁。過驚恐。後皆不可犯。犯之。輕則成痼疾。重則卽死亡。●以上人忌。切宜禁戒。

按以上逐月戒期。及天忌人忌等日外。每月尙有六七日毫無忌犯之日。若論保身之士。每具本屬至多三四次。故能疾病不侵。精神強固。而且寡慾者必多男。後嗣身體亦必強固。彼少年新娶。往往縱慾戕身。使百年好合。一時斷喪淨盡。深可悲也。則何如謹守戒期。保身立命。使後日有偕老齊眉之樂。子孫衆多之慶。何快如之。

保身廣嗣要義

蘊衡書廣嗣說。古者男子三十而娶。女子二十而嫁。欲其陰陽完足。故交而孕。孕而育。育而壽。後世不能遵。男未滿十六。女未滿十四。早通世故。則五臟有不滿之處。後來有奇怪之病。是以生多不育。民多夭亡。總因未知爲人父母之道。此道關係不小。卻是爲父者不便教子。爲師者不便傳弟。後來始覺悔之晚矣。特以粗淺之言。欲使後生都曉。凡女子十四歲後。經水每月一來。三日方止。總以三十日來一次爲正。若二十幾日便來。或三十幾日方來。便爲

經水不調，多難得子。故須服藥，先調女經。經調然後夫婦相合，須待經血三日已淨之後，方可行之。袁了凡云：凡婦人行經將盡，只有一日，細縕之候，謂春意動也。但含羞不肯言，爲丈夫者，平日密告之，令其至此自言，可以一舉而得。張景岳云：男女交媾成胎者，精血還是後天有形之物，而一點先天無形之氣到，然後成孕。男子先天之氣勝，多生男；女子先天之氣勝，多生女。正在兩氣齊到，適逢其會處分也。但女子非情動之極，不易到，到則子宮必開，吸而受孕矣。但恐男子精薄不能成胎，施於無用耳。故上等者保精數月，纔一行。古云：寡慾多生子是也。中等者待女子經淨之後則行，或月明朗無風雨之夜亦可。平常之日，不近女身，或另一房，另一牀，另一被，不唯生子易成，自己身體亦保。若下等者，不論時日，或三五夜一次，此人必成內傷。又有下而又下者，夜夜一次，或一夜兩次，如此亡命之徒，必定精如水薄，不久得暴病而死。凡朔望先夜，不可行。五更半夜，身中陽氣初生，一次當百次，不可行。身有小病，不可行。重病變重，重病必死。醉飽之後，坐船走路，二三日內不可行。大風大雷，大冷大熱，日蝕月蝕，神前樞後，持齋祭祀，日月燈燭光照，不可行。庚申日，甲子日，本命生辰日，每月二十八日，人神不可行。且男女交媾，與夢遺之後，三五日內，莫下冷水，不可沾一切冷飯食，不可吃涼

藥。如必要服藥之病。寧可對醫明言。猶之孕婦。不可全靠勸脈。庶不誤事。暑天不可貪涼。冷天不可冒風雨。若犯之。必有厥陰之證。男縮陽。女縮乳。四肢冰冷。肚疼而死。雖參附不救。女子行經體虛者。禁忌亦同。又如小產。大半由夫婦不謹。三五月內明產。人得而知。一月半月內暗產。人多不知。蓋一月屬肝。肝主疏泄。夫婦不謹。常有前半月受胎。後半月已墮而不知者。甚有屢孕屢墮。肝脈屢傷。遂至終身不孕者有之。凡婦人受胎後。謹戒不犯。百不失一。況子在腹中。賴母經血保養。交媾一次。胎元便損一次。倖得生下。病患必多。痘證必險。多難養成。世之愛子者。多方隄防保全。至十六七歲。根本不傷。一生少病。那知在母腹中。早已受此傷慘。出世不得成人。是誰之過。豈不痛哉。有用丸散入宮而種子。豈精血中更容渣滓混合乎。古語云。種子而生子。斷筋穿骨死。甚言種未必生。生未必育。徒造孽也。是皆爲父母之道。昔者樂與人言。今老矣。不能徧及。作此以代口傳。世人各知自愛。以愛其子可也。●孫真人曰。人身非金鐵鑄成之身。乃氣血團結之身。人於色慾不能自節。初謂無礙。偶爾任情。既而日損月傷。精髓虧。氣血敗。而身死矣。蓋人之氣血。行於六經。一日行一經。六日而週六經。陽明、少陽、太陽、少陰、厥陰、是謂六經。故外感之最輕者。必以七日經盡而汗解。蓋氣血一週也。人當慾事濃時。

無不心跳自汗。身熱神迷。蓋因骨節豁開。筋脈離脫。精髓既洩。一經之氣血即傷。一經既傷。必待七日。氣血仍週至此經之日。方能復元。易云。七日來復。即休養七日之義。世人未及七日。而又走洩。經氣不能復元。一傷再傷。以致外感內虧。百病俱起。人皆歸咎時氣。指為適然之病。不知非一朝一夕之故。其所由來者漸矣。由於未能謹守七日來復之義也。今立限制。以為節慾保身之本。二十歲時。以七日一次為準。三十歲時。以十四日一次為準。四十歲時。則宜二十八日一次。五十歲時。則宜四十五日一次。至六十歲時。則天癸已絕。不能發生。男子

二八而天癸至。十六歲也。八八而天癸絕。六十四歲也。女子二七而天癸至。十四歲也。七七而天癸絕。四十九歲也。天癸者。天一之水。謂精髓血脈流通。宜洩。可以發生也。天癸絕。則不能發生矣。

急宜斷色慾。絕房事。固精髓。以清潔閉藏為本。萬不可走洩矣。以上限制日期。專指春秋兩季而言。若冬夏兩季。一則火令極熱。發洩無餘。一則水令極寒。閉藏極密。即少年時。亦以斷慾為主。否則二十歲時。或可十四日一次。三十歲時。或可二十八日一次。四十歲時。或可四十五日一次。至五十歲時。血氣大衰。夏令或可六十日一次。冬令則宜謹守不洩。蓋天地與人之氣。冬令閉藏至密。專為來春發生之本。尤重於夏令十倍也。依此者。可卻病延年。違此者。必多病促壽。●王蓮航曰。昔蓮池大師謂王大契曰。明明安毒藥於惡食中。是殺之

慘也。暗暗安毒藥於美食中，是慾之慘也。嗚呼！往古來今，才人志士，所志鮮成，類多無壽，殆以多慾而致然也。彼於事前，亦知自愛也。於事後，亦知追悔也。及乎慾心一熾，而壯志遂泯，以爲一次當無傷，以後當不再及，以後又作如此想。至下次皆作如是想。慾以縱而愈熾，以至不能自制，無可奈何，由是而精竭矣，體弱矣，病矣，死矣。故事前自愛無益也，事後追悔無及也。須于將行事時遏止之，亟思此事果有何趣，事後當有何害，不禁啞然失笑，嗒然喪氣。夫遏一時之慾，伸畢世之志，才人志士，所當樂從也。彼或甘於下流，自促其生者，吾未如之何矣。謹按蓮師之言，蓋明明對已守歸戒者說，其告誡節慾，則非爲邪淫也明矣。總之縱慾成患，家室尙然，何況狎邪漁色，則更自取滅亡，而甘淪於畜類也，可不哀哉。

闢自由結婚邪說文

人稟天地陰陽之氣，受父母精血之質而生。其初生以至三四歲，一舉一動，皆須父母撫育。自後雖能自行動，而諸凡事理，皆須父母安排教導，否則便不能生存于世。及其年長，則父母爲之擇配，俾得享男女居室之樂，以期內外相輔，得以奉父母而盡子職，綿世系而防老死。此天地固然之道，聖人法天制禮，俾人各守彝倫，以盡人道與子道耳。若不依

聖人之禮。與父母之命。唯以兩情愛戀而爲夫婦。則與禽獸何異。彼不知好歹者。專效歐洲惡風。盛倡自由結婚。何不倡初生卽不受父母撫育教導。而自由成立爲人乎。彼若能一生于世。卽自由成立。絕不受父母撫育教導。則自由結婚。實爲至當之理事。若不能如此。唯年長能以自力致男女愛戀爲標準者。卽爲逆天悖理。侮聖蔑倫之極重罪人也。其心行與禽獸同。實則禽獸不如也。何也。以禽獸不知倫理。人知倫理。知倫理而廢倫理。斯居禽獸之下矣。無錫章甫居士楊鍾鈺。欲挽頹風。作關自由結婚邪說之文。因爲序引。以發其所未發。冀倡此說者。咸覺悟焉。古莘趙紹伊序。

今世俗盛倡自由結婚。此蕩子淫女之所爲。潰禮義之防。紊內外之別。正孟子所斥鑽穴踰牆。鄭風所譏采蘭贈芍。未有端慤之士。淑靜之女。而出於自由結婚者。請申論之。曲禮云。男女不雜坐。不親授。外言不入於闔。內言不出於闔。男女非有行媒。不相知名。非受幣。不交。不觀。故日月以告君。齋戒以告鬼神。爲酒食以召鄉黨僚友。以厚男女之別。如是則男女皆別。謙明微。非禮勿視聽言動。安得有自由結婚。孔子云。放鄭聲。鄭聲淫。惡其男女無別也。孟子云。丈夫生而願爲之有室。女子生而願爲之有家。不待父母之命。媒妁之言。則父母國人皆

賤之。賤其忘親而寡廉鮮恥也。又云。人之所以異於禽獸者幾希。蓋禽獸皆自由戀愛。人爲萬物之靈。故聖人作爲禮義。以遠于禽獸。奈何去之。昏禮云。父親醮子。而命之親迎。揖讓升堂。再拜奠雁。蓋親受之於父母也。男女有別。然後夫婦有義。郊特牲云。婦人從人者也。幼從父兄。然則男女皆遵父兄之命。安得有自由結婚。內則云。七年男女不同席。不共食。又云。禮。婚於謹。內外。男子居外。女子居內。深宮固門。闔寺守之。又云。男不言內。女不言外。男子入內。不噓。不指。女子出門。必擁蔽其面。道路。男子由左。婦人由右。男女之別。始於家庭。而達於道路。內外謹嚴如此。安得有自由結婚。且娶婦。所以養親也。詩常棣云。妻子好合。如鼓瑟琴。孔子云。父母其順矣乎。內則云。子甚宜其妻。父母不悅。出。子不宜其妻。父母曰。此善事也。子行夫婦之禮焉。沒身不衰。先哲有言。子之孝。不如率婦以爲孝。婦能養親者也。古者皆由父母主婚。故能博親歡。而申孝養也。不順乎親。不可以爲子。婚姻禮之大本。人子具有孝心。自當以父母之心爲心也。若乃不由父母。不問門第德性。而曰。自由戀愛。則與嫖客娼妓何異。吾未見嫖客娼妓。而能孝養其父母舅姑者也。今自由邪說。首推翻昏禮。因之背天常之倫。棄父母之命。不孝又兼不信不義。其千言萬語。種種理由。不過曰。自由戀愛而已。試問羽毛鱗

介之族。何一非自由戀愛。彼何知有禮義。何知孝親敬長。可以人而同於羽毛鱗介乎。且夫婦以義合。主之以尊親。重之以盟約。申之以六禮。故能一與之齊。終身不改。同患難。同安樂。孝親睦族而宜子孫。今以自由戀愛。便成夫婦。背尊親。蔑禮義。則金盡交絕。色衰愛弛。初則自由結合。終必自由離散。名節掃地。州鄉不齒。彼以自由爲終身幸福。吾恐以不正當之自由。而犧牲男女終身幸福。玷家風而斬世澤者。居其大多數也。故曰。未有端慝之士。淑靜之女。而忍出於自由結婚者。禮大傳云。男女有別。不可與民變革。郊特牲云。男女有別。然後父子親。蓋有夫婦。然後有父子兄弟。男女無別。則夫婦之倫斃。而倫常盡廢。人禽界混。自由結婚之流毒如此。可不慎哉。或且以東西各國爲藉口。詎知疏財仗義。歐美特長。各國政藝。可採亦多。獨以不嚴男女之別爲效法。以致私胎墮胎者日衆。刑律不能制止。大背人道主義。近年法國以人口減少。而強迫婚姻。日本以女學生墮落。而注重風紀。究其原因。皆由淫佚。我國教化最先。婦女名節。迥非各國所及。今當採各國之長。而捨其短。不當棄我之長。而效彼之淫靡薄俗也。孟子云。庠序學校。皆以明倫。管子云。禮義廉恥。國之四維。竊望全國學界。推行孔孟之教。以化寰球。以闢詖淫邪遁之說。而致萬國於文軌大同之盛。其必自人人講

明倫理。敦崇禮義。廉恥始乎。

不可錄紀驗 附

友人季邦采爲吳興知名士。住南潯鎮。方予初印不可錄。適季掌教鎮海。札致二百本。囑其分給生童。比接來信。責予迂闊。且云已將此錄置之高閣矣。未兩日。差人來言。願刷五百本。予理前說以卻之。旋復專足持札。堅懇始知夢伊父諄囑云。爾不印送不可錄。爾子烏能入泮。因囑刷印一千本。廣爲流布。後據云。接到伊子采芹之信。正發願印書之日也。其靈驗如此。杭城新橋積翠庵僧靜緣。向好善。一日大雪叩門。余以爲募緣。曰我家貧寒。無力相助。僧曰願借不可錄板。刷印幾千本施送。余欣諾之。而詰其何以陡發此念。冒雪而來。僧曰昨夜夢土地神告曰。印送不可錄。可免大災。今早徧訪施主。知板係潭府所藏。故特來借取耳。僧印送後。次年居民失火。左右均遭回錄。獨僧庵無恙。益信神明勸善。冥冥不爽。陳海曙記。

庚午初夏。夜夢兩童子來。語予曰。文昌帝君召爾有話。因同往。引至中翠亭一院。見其額曰。大洞閣。隨童子至大殿。見帝君中坐。予叩頭起侍。帝君言曰。世閒刊送善書甚多。惟不可錄久已不行。爾當爲我佈散。卽命兩童抬出一箱。內皆剝蝕字紙。檢閱卽不可錄之殘帙。

也。正在想念此書未經見過。從何辦起。帝君又諭曰。鄉試將近。當速爲之。命兩童送予出。而醒。次日各坊尋覓。均稱不知。焦思月餘。突有人將不可錄書板來售。序文首張已失。閱尾張。知係萬九沙先生所刻。甚喜買之。卽刷印三千本。於七月初一早。虔送至院。甫到大門。一僧便啟口問曰。可是陳居士送不可錄來耶。予惟唯。卻甚駭異。趨詣大殿焚香。叩呈。帝座之前。其僧延至客座待茶。叩其法名。爲元本。問其何以知予送書來。且知書名。僧曰。昨夜得夢。帝君諭我候門接書。故早起相候。予深爲肅然。可知善書行世。上格蒼穹。能身體力行。其功德尤不可量。所願共體。帝君救世苦心。同登寶筏。望廣爲流傳。俾舉世力懲其不可。以勉爲其所可。庶不負神明之付託云爾。清嘉慶庚午六月古鹽官陳海曙自記

丙戌歲。余妹于歸後。忽起痰癩之證。時常啼哭。飲食不納。或云。冲犯花粉煞所致。延師巫。百方禳解。迄無效驗。而且不肯服藥。竭數人之力。藥竟涓滴難入。以致半載之後。身瘦如柴。堂上深爲憂慮。萬分焦灼。生因在酆都帝。及城隍神前。具疏許願。印送不可錄五千本。許願後。竟卽轉機。便肯服藥。因連進消痰之劑。一月後。卽平復如常。業已痊愈。將屆一載。且身體較前反健。因卽用活字板。如數排印。以答神庥。拜誌靈驗於右。清光緒戊子三月婁東下郡悔

過生謹記

惜字近證

書契之治。古以汗簡。一變而用楮墨。再變而爲劖劖。浸趨巧便。而文字之流行益廣矣。劖劖之法。先以紙書之。覆而糊之於板。復摩擦其紙背。俾紙去而字存。此擦去之紙。仍有字形。不可褻汙。嘉慶己丑之秋。杭城保佑橋。鏗工金姓。病中見兩鬼隸攝去。拜謁堂皇。所見神如貴官像。神曰。汝穢褻字紙。法當刑責。金訴以術業在是。不得不爾。神曰。不然。汝當摩擦之際。所落紙屑。宜置積淨處。隨時焚送。汝乃灑棄塔除。甚至傾潑垃圾之中。無處不有。非穢褻而何。金無詞。竟受責。迨醒。臀股痛楚殊甚。噫。神之示誡深切。而復爲職是業者。開一消孽法門。人亦何憚而不遵奉哉。爰記是事。殿於末頁。願業刻字者。以此爲前車之鑑。而謹循神教。則幸矣。陳海曙記。

附錄

勸燬淫書說

三代而下。世多邪說。而邪說之最。足以害人心。世道者。莫如淫詞小說。爲甚。蓋聖賢經傳。唯

恐不能覺天下之愚迷。而淫詞小說唯恐不能喪斯民之廉恥。以故小說出而淫風熾。淫詞興而貞德衰。然誰無羞惡之心。豈肯作禽獸之事。但以聰明子弟靈敏婦女。一觀此書。悉爲所惑。初則豔其詞章。以爲佳妙。繼則情隨文轉。不能自持。遂致竟以希聖希賢。宜家宜國之身。甘作鑽穴踰牆偷香竊玉之事。而絕無顧惜者。皆此等邪書之所蠱惑也。其毒人也。烈于蜜餞砒霜。其陷人也。慘于雪覆坑坎。令人滅理而亂倫。折福而損壽。破家而殺身。辱先而絕後。及其死也。尚使神識墮于地獄。受諸極苦。久經長劫。莫由出離。可不哀哉。凡作此書及販賣此書者。其罪甚于叛逆之首。亂賊之魁。當爲國法所必誅。天律所不赦也。奉勸當權諸名公偉人。及一切有心世道仁人君子。凡見此等人。務必勸令改業。凡見此等書及板務必盡行焚燬。有力則獨任其資。無力則勸衆共舉。又祈輾轉化導。俾人各景從。必期于世間永無此書。人民各敦彝倫。而後已。將見佛天雲護。災障冰消。身心安泰。家門迪吉。富壽康寧。現身獲箕疇之五福。助徽爵位。後裔納伊訓之百祥矣。特將收藏小說四害。并焚燬淫書十法。詳列于後。企有心世道者。采取而舉行焉。

收藏小說四害

一玷品行 覽此等書必非正人佳士昔時南海一縣令好觀淫書手抄小本日玩之不意亂入詳册上司怒其無行參革而死。

二敗閨門 凡好藏淫書好唱彈詞之家婦女率多醜聲其秉性幽貞者或以瘵疾死餘多不忍言矣可勝痛哉。

三害子弟 藏此書者子弟必然偷看其佳者以此早知覺早破身或以疾死卽令不死轉而自悔而元氣一散斷不能成大器世間儘有佳子弟秀出一時迄無成就多由渾金璞玉早年玷缺皆乃父兄巾箱中密藏物所害也若中下者必好此破家矣金陵一名家子過目成誦年十三博通經史一日偷看西廂曲本忘餐廢寢七日夜而元陽一走隨卽頽敗醫云心腎絕矣遂死。

四多惡疾 好此種書必多疾必多異疾杭州宋司馬人極豐偉年甫五十卽乞歸謂家人曰我幼時喜小說風痰入腎不久矣未幾死看淫書之害如此嗚呼真可爲痛哭者也再詳十法普告同人。

焚燬淫書十法

第一法 奉勸執政名公。院會議士。疏陳其害。請令申明。禁於天下。永遠杜絕。著為條例。此

斬草除根法也。淫書陷溺人心。大傷風化。顯與治道相違。以致每年添出無數姦情命案。

毒流天下。著此等書。售此等書。蓄此等書者。當服上刑。絕此等書。禁此等書。焚此等書者。

必受上賞。張君孟球。任河南按察司。居官廉潔。恩威並施。最喜刻印善書。廣行善事。最惡淫書淫畫。春方及墮胎賭具等物。必嚴禁之。首獲有厚賞。夫人聞公鈔傳善書。

亦與衣飾相助。生五子。學庠。應造。紹賢。企齡。景祈。俱擢高科。登顯仕。公無疾而終。

第二法 奉勸各直省守土官長。下車伊始。即嚴行禁止。翻刻淫書者。必究。禁人家毋許收

藏淫書板。禁畫師。毋許描繪淫畫。禁奸徒。毋許售賣春藥。禁書賈。毋許發兌淫書。禁匪流

毋許製造淫具。禁鈔胥。毋許傳播春方。編造淫集。有不遵者。酌置典刑。無稍姑息。墮胎之

藥術。每見郡邑鄉鎮。輒有匪人。於通衢狹巷。徧布招帖。煽惑男女。服之者無不傷胎。衆且

害母。且姦民恃此私奔苟合。愈長淫風。能禁止者。一可救嬰兒之命。一可杜邪淫之心。功

莫大焉。伏願地方官長。經過所屬街巷等處。一見市肆淫書小說。及春方媚藥。牆壁招帖

實心認真。迅即飛飭。安役根究。著落。懲其店主。膠黨。燬其卷帙。方藥。責令改業。再行密訪

有私行貨賣者。科以重罪。必一一盡燬。其書。焚其板。而後已。此真居官第一快心事。亦真

嚴禁。嚴禁。

第三法

奉勸膠庠吉士。不談閨閻。不製豔曲。嚴戒生徒。毋許購藏淫書。淫畫。凡筆墨有傷

風化者必投諸火。朋友有犯戒者，務須苦口良言，婉轉勸止。某生好撰諧曲，聞者無不動聽。其妻委頗解字義，窺見之，從此遂有外交。生聞知，置其妻妾，妻反唇曰：君好撰諧曲，諱諱以淫樂教人。今日之事，乃護運台命也。何足深怪。生無言可答。長歎一聲，無疾而死。

第四法 奉勸富家大族，廣收淫籍，隨買隨焚。有鉅力者，盡劈其板。力稍遜者，多燬其書。每

一舉步一出外時，必買歸而焚化焉。日積月累，功德無涯。倘貧窮親友，不幸業此，務須出

資勸其改業，買其所藏之書，盡付丙丁。凡一切彈唱小說，不許進門。石琢堂殿撰為諸生

任。家置一紙庫，名曰孽海。凡見淫詞豔曲，壞人心術，及得罪名教之書，悉納其中，燒之，不徒惜字而已。

第五法 奉勸寒素人家，無力買燒淫書及板，當手鈔燒燬淫書，善報各處分送，倘無暇鈔

寫，儘可逢人勸戒，以口代書。隨緣指點，功亦不小。均是功德。

第六法 奉勸刻書店鋪，議定行規，凡遇淫穢冊籍，概不受鐫。有私刻者，公同議罰。如此，則

淫書不絕，而自絕陰功，浩大更不待言。賺錢有限，造孽靡涯。

第七法 奉勸各省書坊，概不發兌淫書，免使天下識字之人，同趨孽海。江南書買務留，積

說。及淫畫圖像，人勸不聽，以為賣古書，不如賣時文。印時文，不如印小說淫畫，以售多而利速也。其家財由此頗厚，不數年，目雙瞽，所刻諸板，一火而燼。及死，棺斂無措，妻子有不

忍言者。

第八法

奉勸畫家不畫淫畫。照相館不許代印。免使天下不識字之人共沈孽海。福建諸畫彩色淫畫。浪遊都下。名重而價亦高。諸貴人子弟。日暱近之。家遂富。一夜盜入旅邸。澗大呼。盜先砍落其手。連揮數刃而絕。財帛席捲去。後廣東李孝廉得其遺稿。歎曰。是物流傳。害人子弟不少。償其值而悉火之。李於是年中。式子亦先後聯捷南宮。○世間造惡未。有甚於畫淫畫者。無論識字不識字之人。一概心醉神馳。同驅入禽獸之域。吾見擅此技者。人人斬後。蓋其畫幅豔傳。不知害了多少子弟。壞了多少閨門。恐絕嗣不足蔽其辜也。至其妻其女。其媳。鮮不淫亂者。由其朝夕見聞。無非淫狀。即有貞潔之性。亦化而為邪。且其人亦必早夭。而不壽。蓋其執筆摹擬。刻刻淫心。搖蕩真精。浮散夢遺。滑精脫陽等證。皆相繼而作也。嗚呼。慘矣。夫百工技藝。何事不可為。而乃為此。山水花鳥。何物不可畫。而乃畫此。處心積慮。將使天下無人不淫。而後快。吾恐技愈精而孽愈重。孽愈重而報愈酷矣。

第九法

奉勸醫家不傳春方。力辨其謬。免使淫徒矯揉造作。枉送性命。醫書中間。有附載。願醫者。弗傳與人。並削去書中此一條可也。其餘旁門外道。諸書。壞人心術。喪人廉恥。最邪矣。最淫惡。罪入無間地獄。學道者。決不可看。能燒其書。毀其板。功莫大焉。

第十法

奉勸賓僚宴會。弗點淫戲。免使年少士女蕩心失魂。變生倉猝。且免暗中斲喪。癆瘵。夭亡。庶共躋仁壽云。戲館之中。少長咸集。波優伶。身為賤役。不惜醜態。以歡媚於人。回觀之。則心神俱蕩。或斲喪其真元。或馳騫乎花柳。鑽穴踰牆之行。無不為。偷期密約之事。無不幹。病從此生。身從此殞。傷風敗俗。可勝言哉。故為高明者。勸嗣後。凡入戲館。切勿點。及淫戲。酬願敬神。尤宜痛戒。天下斷未。有聰明正直之神。而喜觀淫戲者。亦未有聰明正。實之神。而不惡淫戲者。蓋敬神本欲求福。而淫戲適足買禍。况廟中不能禁。婦女不來。而

畫豎者尤易蠱惑。甚或聞女看之而動情。嬌婦看之而失節。人何苦以一時之意興。造此無窮罪孽。說。願與諸同志共戒之。

以上十法。法法相通。遵而行之。便是天堂捷徑。而種種福報在其中矣。逆而反之。便是地獄孽緣。而種種禍報在其中矣。人其知所自警哉。

德光袁曰。刻淫書。誘蕩子。殺人不見血。有聖人者出。急應收燬。一切淫污邪書及書板。有翻刻者。處以極刑。比於五逆。罪在不赦。庶乎風俗醇而士習可正也。袁了凡曰。取淫穢邪書。惡狀及謗語。焚化者。得子孫忠孝節義報。好閱淫詞小說。將此等淫穢書與聖賢書並貯者。得子孫淫佚報。翻印淫詞小說。惡狀販賣射利者。得子孫娼優下賤報。

東萊呂氏曰。教小兒當以正。不可使之情竇早開。黃藜乙蒙養篇云。人家子弟已識字後。卽禁看淫書小說。此種本屬子虛烏有。少年誤認爲真。眩目蕩心。最爲害事。常稽察其背後。借看。搜出卽投之於火。十一二歲後。父宜攜之同寢。留心察其睡中動靜。居常女婢僕婦。不論美惡。老少。不宜親近。只此一關。能與牢守。功名壽算。終身受用不盡。

務本叢談曰。家中父母。對於兒童。務須嚴厲教育。監察。諸如小兒幼時。母親常把喫物。先在自己嘴內嚼碎。傳過小兒嘴內喫下。最害衛生。或歡喜時候。用手常弄小兒陽物爲戲。他從

小已受此種感覺。將來成人時。恐就有手淫惡習。(手淫害處最大。犯者必至傷身殞命)
 或小兒在無事時。偶然自己捫弄陽物。亦須嚴禁。以免養成習慣。淫書淫畫淫戲。小兒成童
 時。萬不可看。此等如蜜裏砒霜。入口即死。或僥倖不死。亦必釀成夢遺滑精等症。終身受害
 無窮。因看淫書等時。心性搖蕩。元陽暗中走失。身體受大損傷。所以一有遺精之病。一直到
 死。難望挽回。後來終身抱痛。追悔莫及。為父母者。務須認真監督。暗中時常察其舉動。一見
 有淫書淫畫等。在背後偷看。立即搜出銷燬。庶免遺禍。如此方能保全兒童性命。又凡夫婦
 交媾之際。切勿乳子。因小兒若食淫乳。長大定然生性淫邪。切須戒忌。

詩歌

禁花鼓淫戲

六首 此戲誨淫最甚。為第一傷風敗俗事。官法論禁。多為差役賄庇。願賢明當道力挽之。

闕名

是雜作備長淫風。男女登臺醜態同。廉恥盡亡名教壞。狂瀾孰障百川東。
若能永禁。定卜俎豆。

千秋。

任爾鄉村農事忙。一聞此戲便拋荒。錢財耗盡催科誤。苦迫飢寒起盜腸。
有戲必有。大賭。故小。

其力耕所餘。半為此輩引誘破家。即其代領申銀。多有從此傾囊者。

大與頹節孝坊。移風那及誨淫狂。幾多苦節清門女。從此灰心作未亡。俗語云。花

日。十個寡婦九改節。是國家歲旌。節孝。幸百人。不敢淫戲。數回之力也。

爭弟林教入戲場。須知蜜裏有砒霜。元精暗喪成癆瘵。撒子拋妻淚萬行。若要子弟

第一先禁他。不

萬目頹波第一端。傷風敗俗萬千般。士林尙展迴瀾手。救世豐功莫小看。望。眼將穿。誰為同調。

戒看淫書淫畫。二首。淫為萬惡之首。淫書淫畫。為近世第一傷風敗俗之事。 關名

淫書淫畫害人多。偏是聰明易著魔。暗喪元精成痼疾。如何苦學撲燈蛾。看之者。如蛾投火。自

尋死。路耳。

荒唐之說本空虛。誤煞青年是此書。莫以消閒輕入目。付之一炬禍根除。每年殺害

其數。急須請。焚。收買燒燬。

戒點淫戲。二首。近時又有花鼓灘。各各種淫戲。更織。變。不塘。導。淫。傷。化。莫此為甚。大。可為世道之憂。 關名

粉面妖燒假若真。漫言貽害萬千人。窺簾我有親生女。異日如何守節貞。家家有此

時害。益。益。益。己。

敬神宴客意何隆。戲演宣淫罪莫窮。父子師生皆在座。閨房何事笑談中。想看看。豈

可笑之事。願當代仔肩世道。大君子。力禁廣勸。造福無量。

紀實

蘇城林阿秀。喜唱淫歌邪曲。喉生乳鵝。腐爛而死。道光初年事。評為想開心。白送性命。看他臨死時。尙作張口狀。

淫詞豔曲本荒唐。何事癡人習學忙。病入咽喉能唱否。可憐張口痛殍亡。

陽湖東鄉某村。演花鼓戲十日。一月內。寡婦改嫁者九人。閨女因奸逃逸者三人。為首

者未幾患絞腸痧死。

一曲淫詞變化神。幾多貞節盡懷春。卽看現報抽腸死。已害鄉村千萬人。

常熟西鄉某。開賭演花鼓淫戲。其子忽因夢遺精脫而死。女隨奸夫逃逸。某氣忿死。死

後被火。

有人坑弄孰為開。姦盜邪淫此作媒。到底害人原自害。一家出醜理應該。

甯波某觀劇。點淫戲取樂。是日其妻其女。俱因姦逃逸。某忽患異疾。死時口呼城隍爺

拿我云。道光二十四年四月事。

一曲梨園樂趣生。自家妻女早移情。明神赫赫親行罰。聽罷歌聲聽哭聲。

常州某好刻淫書唱本。被火燒死。

胎毒種是淫書。回祿臨門盡掃除。燒得心肝焦似炭。一生射利竟何如。

淫書自悔詞。潮州王生。年少負美才。因喜看淫書。成怯症。病篤。自悔。此其絕筆也。年僅二十一。同人皆為惋惜。

夢裏猶呼才子詞。一編曾此誤情癡。而今病骨支離甚。十載栽培負父師。

手筆伊誰種毒深。棗梨傳布壞人心。寄聲同學諸兄弟。好鑒前車惜寸陰。

西國立志編曰。稗官小說。為破壞教養。博人嘲笑之書。今世撰著此書之人。以欲投時所好。

往往不嫌俚俗。不避浪謔。破人倫。冒國法而為之。其罪實不容於死。陀旃拉斯曰。人不可著。

戲文戲畫。而毒痛世人。戎斯打林曰。稗官小說。害遍羣生。而其害心志未堅之青年。更甚於。

淫書。

張某稟異才。好編小說。刊板發賣。自謂筆底雲烟。無傷陰德。一夕。夢其父訶之曰。爾所著諸。

刻。令閱者目眩神飛。因而敗人行檢者不少。冥司於此等案。降罰最酷。爾本前程遠大。壽數。

綿長。今緣是折消矣。可惜祖先數世培植。一旦頓喪爾手。尚謂無傷耶。張驚寤。大悔。未幾。全。

家溺死。

江南有書賈朱祥者。好刻淫書小說。租賣傳觀。友人皆勸其勿刻。朱笑以爲迂。不數年。目雙瞽。一日火起。生以兩目不見。逃避不及。半身燒爛。哀號痛苦三日而死。死時自悔曰。我刻淫書。淫畫。得發小財。害人不少。應該如此。願天下同業人。早早劈板燒書。勿似我懊悔不及也。後妻女流入娼家。嗣亦絕。

渤海全如玉。雖係貧人。卻孳孳好善。見人作好事。則獎勸鼓舞。始終不倦。又嘗力疾手錄善書。普化世人。一日泛海。被颶風飄至一山。全登其絕頂。遙望海天一色。十分暢快。忽有一道者。黃袍棕履。古貌長髯。從林中出。謂全曰。世人尙假上帝喜真。爾生平勸善事。修善書。皆係真心。不求人知。功莫大焉。全謙不敢當。道者又曰。儒者具有聰明。不爲聖賢闡發義理。反編造淫詞豔曲。流害天下萬世。此等人墮地獄中。受無量苦。永無出期。爾試往觀之。知彼之罪。則知爾之功矣。乃攜全手。行雲霧中。須臾見一城。榜曰。酆都守門軍役。皆奇形異狀。見道者伏地叩首。又至一大署。侍衛林立。亦震慚拜伏。堂額曰。森羅之殿。兩柱聯曰。爾既如斯。任爾奸任爾詐。任爾作惡。少不得庭前勘問。我誠無奈。盡我法。盡我理。盡我奉公。又何須堂下哀

備至。道者曰：淫詞豔曲，最爲人心之害。陰間受罰，陽世不知犯者，往看明白。傳語世人，倘得回心向道，亦大慈悲也。卽有二役，將全引至鬼卒曰：此乃著作淫穢小說書籍者。全又問罪有盡期否。卒曰：萬劫沈淪，求入蛆蟲道，未可得也。焉有盡期。全亦心懼，欲回。役復引至殿。道者指王謂全曰：此明季楊忠愍公也。在世忠直參嚴，高五姦十罪。上帝深嘉，特接今職。爾回並爲宣揚，庶見上天賞善，罰惡毫厘不爽也。乃辭王，仍攜全手，回至原山，值風順，別道者掛帆而去。逢人道其所見，諄諄勸勉云。

普爲印施壽康寶鑑及轉展流通讚揚勸閱諸善士回向頌曰

一切事業，以身爲本。身若受虧，事俱消隕。傷身之事，種種不一。最酷烈者，莫過淫欲。是以君子持身如玉，閑邪存誠。夙夜兢惕，如是制心，欲念不起。何況邪淫，蔑倫越理。世有愚夫，不知此義，每致縱欲，不遵禮制。貪暫時樂，受長劫苦。減算折福，尙其小耳。以故前賢敬輯此編，冀諸同倫，共樂性天。不慧有感，增訂流傳。高懸寶鑑，以拯青年。德廣居士，捐洋千六。印送各界。期登壽域。又有善士，隨緣附印。欲令此編，徧布遠近。願諸閱者，擴充此心。展轉流布。普令見

聞。庶可同倫。悉獲壽康。子嗣賢善。長發其祥。凡出資者。及讚助人。災障消滅。福壽孔殷。先亡祖禰。超生淨土。後嗣子孫。吉慶無已。世運日隆。風俗日美。先賢懿範。人各繼武。爰書俚語。用表芹忱。祈發大慈。自利利人。

民國十六年丁卯孟夏古莘常慚愧僧釋印光謹撰

香蕉芋頭二種不可同時吃。嘉定徐子山言。一友吃香蕉已。隨即吃飯。菜有芋頭。吃飯不久。其人卽死。其形容若中重毒者。大家莫明其故。後未幾月。又有一人。亦復如是而死。若中毒狀。請西醫驗其糞。謂兩粘物相反所致。知此人係吃此二物而死。前之一人。亦係因此而死。一日往親戚家。言及此事。羣相驚訝。試以二種和成一團。與雞食之。其雞卽死。又以二物置於一器。次日則完全淤黑。大失本色。是知香蕉芋頭不可同食。因附於此。以期舉世咸知云。

蘇州弘化社流通書籍規約

世變日亟。人類之良知盡喪。法道垂秋。修治之正軌。罔存。匡扶挽救。端賴羣賢。宜揚正誼。其惟典籍。當代尊宿。印光大師。道高德邵。精素欽崇。歷年印行書籍。不下二十餘種。流布於四方者。何止數十萬冊。讀其書而獲其益者。更何可以數量計哉。茲者大師德臘已高。謝絕諸緣。滅踪息影。隨行之日。乃命其侍者。將所存板籍。悉數歸公。貢諸于世。復由諸同仁。慕義樂助。認定年捐。特設專社。繼續流通。以竟大師未竟之弘願。惟是組織伊始。基本未充。故於流通規約。略示限度。未能盡最。殊抱懼忱。俟將來因緣湊合。再圖推廣。諸希垂亮。至為厚幸焉。

(一) 照本流通

本社印存各種書籍。如有備價來請者。一律照本讓與。凡經本部鑑定之書籍。如有發心附印者。本部當為代勞。但附印書價。須請先惠。

(二) 半價流通

凡機關團體名義。半價購請者。得以半價組書籍。每種一部付與。若以個人名義。半價購請者。得於半價組書籍內。任選兩種。每種一部。如個人欲得二種以上。機關團體。欲得半價組以上者。均須照本繳價。

(三) 全贈流通

(附則)
凡以機關團體名義索請者。得以全贈組書籍。每種一部贈與。若以個人名義索請者。得於全贈組書籍內。任選三種。每種一部。如個人欲得三種以上。機關團體欲得全贈組以上者。均須照本繳價。以上三項如須郵寄一律照加郵費。凡有志研究。而細於資力者。本社當審察情形。方便贈與。以滿其願。

10
777290
印 志

(2)